

四庫全書

子部

欽定四庫全書

子部

萬姓統譜卷十四至十七

詳校官中書臣徐志晉

主事臣祁韻士覆勘

總校官知縣

臣

楊懋珩

校對官中書

臣

王家賓

膳錄監生

臣

朱學濂

欽定四庫全書

萬姓統譜卷十四

明 凌迪知 撰

上平聲

八齊

齊汝南徵音炎帝姜姓之後太公封營丘為齊因氏又

周齊桓衛大

齊豹衛大

齊時戰國

齊明兒

戰國之良士也與周最樓緩之徒合從締交

齊諧

志怪者也諧之言曰鵬之徙南冥也水擊三千里搏扶搖而上九萬里

漢齊晉

光祿大夫

齊受

平恭侯

晉齊恭

注漢書

北齊從

後涼主呂纂謂從曰卿前斫我一何甚也從泣曰隱王先帝所立陛下雖應天順時而微心未

達惟恐陛下不死何謂甚也纂嘉其忠善遇之

唐齊澣

字洗心定州義豐人少開敏李嶠稱其王佐才景雲初姚崇引為御史劾奏常先風教號善職

累官中書舍人朝廷大政必咨之
崇避位舉宋璟自代出其謀也

齊抗

字遐舉義豐人潞孫抗吏事開敏有文雅自
處州刺史徙蘇潭二州召為觀察使諡曰成

齊映

瀛州高陽人舉進士中博學宏詞補河南叅軍
事德宗幸奉天授御史中丞貞元中累官中書

侍郎封河間男與崔造
劉滋並輔政卒諡曰忠

齊季若

正元中陸贄主試試明水賦御溝柳詩季若
得與韓愈歐陽詹賈稜陳羽等同榜皆天下

孤雋偉傑之士
號曰龍虎榜

宋

齊恢

蒲陰人唐宰相映之裔第進士通判陳州為政
簡約州人愛之韓琦薦其賢擢太子左諭德神

宗時以天章閣待制知
相州召糾察在京刑獄

齊廓

會稽人舉進士累官江西淮南轉運使初同時奉世者競為苛刻邀聲名獨廓奉法如平時終

秘書監弟唐學識該博常舉制科仁宗時為職方員外郎所著有學苑精英少微集

齊之禮

字亨仲弋陽人元符進士為監察御史天性仁厚與人交久而愈篤本于忠厚廉介而用

以和裕蓋天性云

齊唐

字祖之山陰人天聖進士南雄州僉判交趾進麒麟唐據史非之衆服其博物歷職方員外郎

齊天覺

青陽人少好學經史子籍靡不淹貫授溫州天福知監調宜城令改贛州僉判

元齊秉節

字子度濱州蒲臺人父珪以戰功累官千戶秉節魁偉沉毅涉獵書史稍知兵法襲父爵

鎮棗陽五年從伐宋以功累官宣武將軍管軍總管又討平安仁賊授棗陽萬戶府副萬戶

齊顯榮

聊城人仕金歸元屢立戰功官至東平路總管府叅議俄兼博州防禦使嘗請民間供給

兵費二萬令得折充賦稅民賴以不困

齊履謙

字伯恒泰定二年以太史院使奉使宣撫江西福建黜罷官吏之貪汚者四百餘人蠲免

括地虛加糧數萬石州縣有以先賢子孫充房夫諸役者悉罷遣之福建憲司職田每畝歲輸米三石民不勝苦履謙命准令輸之由是召怨及還京憲司果誣以他事未幾誣履謙者皆坐事免履謙始得直仍復其官

明齊麟

五臺人洪武己丑進士以文學異等擢翰林院編修累官至禮部侍郎

齊魯

嵩縣人洪武初舉進士授監察御史性鯁介敢言嘗因事進諫擊落二齒魯拾之因謂上曰臣

此二齒當送史館上默然
自是益重之歷遷都御史

齊原芳

洪武初郟城縣丞元末兵燹城邑丘墟原芳
繕城邑修室廬督農事通商賈流民聞風而

歸者九
百餘戶

齊勉

洪武初尉氏知縣清慎蒞職先是雙泊河水為
患築隄六十餘里又康溝河淤塞復疏通之自

是尉氏并鄉
邑俱免水患

齊泰

字闕
陞兵部尚書北平兵入被執不屈死之

齊仕坤

遂寧人洪武末知新河寬仁愛民政清事簡
秩滿致仕歸朝廷以其守官清白賜俸優養

于家

齊政

山陽人永樂中進士知嘉興府時徵役鑄錢民苦妨農政乃分為三番使得更代迄役而民不

勞知

齊整

河南人宣德進士

齊普

山東人寬裕博雅事親以孝聞宣德間由進士任知縣明達治體躬行以率民民服其化

齊之鸞

字瑞卿桐城人正德進士資性高爽文章起軼選庶吉士改給事中多所建白以謏謫崇

德丞歷陞南京刑部郎所至有赫赫聲轉陝西僉事增築邊牆數百里仕至河南按察使

齊宗道

字叔魯廣寧人嘉靖進士歷南京戶部侍郎

齊譽

字文實南昌人嘉靖戊戌進士

倪千乘官音鄭武公封次子于倪因氏又郎黎耒之後

亦為兒氏避讐改為倪

漢倪誰

揚州刺史

倪湯

拾遺

晉倪啓

至德初為江陰太守徙江陰治夏浦為艦浦城

唐倪若水

字子泉恒州藁城人擢進士累官尚書右丞嘗為汴州刺史政尚清淨風化大行玄宗遣

使捕珍禽奇獸於南方若水諫止之徵拜戶部侍郎

倪曙

字孟曦侯官人中和中及第有賦名為太學博士

宋倪天隱

桐廬人號茅岡博學能文嘉祐中縣尉江賢建講堂于先聖殿後請天隱主之士風振發

多所造就嘗為縣令葉安道作題名記論三代以諸侯治後世以郡縣不治甚有理其戒後之為令者企善而懲惡無為石蓋有助于教化云

倪濤

字巨濟廣德人州角能屬文博學強記有操履年十五游太學試第一大觀中舉進士累官左司員外郎以諫議燕雲事忤王黼貶監朝城酒稅再徙茶陵船場卒明年金人犯闕朝廷憶其

言官
一子

倪稱

字文舉宋南渡後入居吳興錦山之下少有學行受業張橫渠浦芮國端調桐川簿人皆以詩

餞之公曰吾與子不交以面而交以心芮曰珠玉之贈不如藥石之賜三子恕思愿皆登科

倪思

字正甫歸安人任禮部侍郎時光宗久不過重華宮思疏十上會召嘉王思言壽皇欲見陛下

亦猶陛下之於嘉王也上為動容韓侂胄
與史彌遠擅權思攻之尤力卒謚文節

倪千里

字起萬東陽人紹興中任蘇學教授因其羨
積養士復作義廩以資禮文之費士心悅服

倪祖常

字子武雲川人大理寺正嘉定壬午四月自
毗陵易守徽州先州民困於和糴郡計二萬

斛強無為有人所弗堪祖常惻然動念屢請申
省事得寢凡除害興利去災致順悉意奉行嘉
熙三年相與
建祠為壽

倪閃

字泰夫沙縣人穎悟嗜學家饒於貲用儉而好
施每出輒以錢自隨遇貧窶則擲於其家不問

其知與否及領鄉薦赴禮闈在京師施與不減
家居時累試弗遇人嗤之曰君日以濟貧為事
何屢屈於春官豈造物有未知耶閃聞益自勵
紹興三年冠起蔓延廣東江西破汀州侵縣境

官兵獲賊縣獄充物閃以愚民無知罹於法日
飲食之明年大饑道殍相枕藉則濟以糜粥沽
者萬計五年赴省隣人多夢豎旂里門書曰饘
粥之功是歲果魁特奏名除寧國府教授出私
帑卹齋舍置膳學田所得俸餘分
貽兄弟姊妹扶滿遷廣東提幹卒

倪文一

一字元芳福安人咸淳間由進士授安仁縣尉
鄰境峒蠻竊發文一單騎至營撫之以恩諭

之以理峒蠻咸信服再授潮州劉憲召置幕下
有疑獄輒委讞之民以無冤秩滿行李蕭然陞
知清流縣元兵南下遂隱居山林世祖徵之不
起嘗作詩曰編籬已種淵明菊鑿沼還栽茂叔
蓮後以
壽終

倪登

字彥及福清人時朝廷敕雲中登為
聘使歿於王事有論語解行於世

元倪士毅

字仲弘休寧人潛心求道嘗學於陳櫟朱敬輿所著有四書輯釋

倪瓚

字元錫無錫人博學好古工詩畫家故饒貲一且舍去曰天下多事矣乃往來五湖三泖間人

望之若

仙去

倪印心

號古洲績溪人生宋末家貧苦學志慷慨尚質樸初與太學生葉一愚為莫逆友一愚歸

元為右丞以才學保奏授將仕郎湖廣儒學副提舉遷承事郎信州路玉山縣尹政稱廉明

倪天淵

字震亨鄞人修髯廣頰氣和行樸與人交終始一致家饒而性尚儉素一冠十年不易事

親竭力樂施予窮乏者假貸無吝色有負逋者即焚券不責其償時江南歲漕白粳經海達畿

天淵籍占漕役躬自蹈海有舟十艘每運數萬石操舟之卒十人一束以紀律至元戊寅漕舟

多沒於風天淵舟漂高灘上衆欲捨舟天淵不從拜且祈俄而神炬見桅端先輝燭人風回獲濟積四十餘年中臺御史袁賽音布哈按行海道嘉其盡力王事且年高行篤狀聞於朝旌之曰高年耆德之門後子可輔仕江浙行省叅政

倪淵

字仲深烏程人明禮經易數之學薦為湖州教授著易說圖說序例等書

明倪望

洪武初石城知縣時承平未久草寇間出民或逃避山林望招之撫以恩惠民始安業

倪孟賢

江西南昌人洪武中為麗水知縣民有賣卜者詣闕誣告大姓陳公望等謀亂命千戶周

原往捕之孟賢聞原將至密召父老詢之父老皆曰無是事孟賢又微服往察見其男女耕織如故乃歸謂察屬曰朝廷命孟賢令是邑惟欲撫輯斯民安於田里今使良善者受惡逆之名

宣朝廷命孟賢意邪既具疏
上聞上命法司論誣告者罪

倪峻

字惟岳無錫人洪武末知沙縣廉靜寡慾焚淫祠興學校廨宇壇壝莫不一新郡五邑稅糧先

是悉轉輸鎮東衛山民不諳海道舟多覆溺輒責使陪償民苦之峻為疏具狀于朝遂改輸福

州衛及延平衛民感其德不忘

倪維哲

晉江人永樂初第進士入翰林為庶吉士授刑部主事以謙獄詳明賜幣帛陞郎中卒

倪以孚

婺源人幼穎異嗜學由縣學生領鄉薦授慈谿學訓導永樂中陞南昌府進賢縣教諭所

至嚴立教條諸生多所造就以疾致仕有齋扁曰思誠廬陵解學士縉為之記云

倪敬

字汝敬峻子少孤力學正統戊辰登進士第拜御史嘗奉上命按省所至有聲景泰末災異迭

見率同官上疏陳敬天修德六事出為宜山典史天順初稍遷都事從安遠侯抑溥討西寇師還卒于官

倪岳

字舜咨錢塘人天順進士歷官太子少保吏部尚書諡文毅父謙正統進士歷官禮部尚書諡

文僖父子翰林自岳始

倪輔

字良弼平湖人天順甲申進士授吏部主事歷禮部郎中擢湖廣左叅政輔性警悟喜談論處

官事不苟工詩為文務去陳語所著有類劇藏藁藏于家

倪璣

字公在咸寧人弘治進士歷給事中正德中謫佐嘉善立法更化嚴保甲奸盜無所容毀淫祠

置義塚及社學書院甚有政教遷知州

倪宗正

浙江人弘治進士

倪天民

字秀夫長洲人成化丁未進士歷布政

倪宗嶽

字鎮卿濮州人正德進士

倪嵩

當塗人嘉靖進士歷官都御史

倪神保

連江人幼失父母常念罔極之恩莫報與妻林氏共禱于天欲得一木兩枝刻一親像奉

祀遂入石屏山求之果見二木相對乃拜祝曰此木果可刻吾父母當自動者三祝畢其木果

三動即取以歸傭工取直募匠刻之既成夫婦奉祝唯謹凡冬溫夏清出告反面一如事生之

儀幾三十年不少替里人嘉其孝誠為白于有司乞旌表之

倪復

字汝新鄞人性端謹嚴毅少力學無間寒暑讀書不摘章摘句而窮索幽眇務得指歸嘗曰士

生程朱後已幸有坦程矣更欲立門戶與抗邪故其說經談理止按先儒成法會而通之尤邃於鍾律平生篤於孝友親喪哭泣遂成目疾弟子束脩之饋不入私室盡以資於弟檢身以禮市肆優場一不履其足人嚴憚之所著有易繫辭解中庸解正蒙發微皇極經世書通解鍾律通考間居漫讀記東巢襍著壺齋問答救災集議禘祫議濬湖議見聞欄楯觀古錄畏菴存藁藏于家

黎

京兆徵音黎侯殷周時國子孫以為氏又風俗通云九黎之後今嶺南多此姓望出九真又宋城

周

黎彌

齊大夫

黎且

齊大夫

南黎景熙

字季明少以孝行聞於世好讀書強記默識而無應對之能後拜著作佐郎勤於所職著

述不
息

唐黎幹

戎州人善星緯術喜談辨玄宗時待詔翰林擢諫議大夫遷京兆尹子姚燧炬燭煇燭孫植右

散騎
常侍

宋

黎錞

字希聲廣安軍渠江人慶厯中進士嘗為直講英宗以蜀士問歐陽修對曰文學有蘇洵經術

有黎
錞

黎志

宜州人治平中許安世榜及第仕為化州路吳川令以政最加勲武騎賜緋魚袋羅咸嘗謂馮

三元以文學魁天下黎特科以及第擅當時並稱為人物之傑出則其人可知矣

黎仲吉

字漢儒寧都人端重該博天禧中叩閣言事丁謂惡其不附已授洪州文學謂罷相召對

辭以疾授袁州戶曹尋解歸隱稱方外高人

黎子雲

昌化軍人城南有載酒堂東坡在僭耳一日訪之遇雨從農家借笠著屐而歸婦人小兒

相隨爭笑邑犬羣吠

黎貴臣

醴陵人從朱子受業講明道學士類多宗之

黎獻

字子文東莞人性警敏篤學問弱冠授徒一依紫陽白鹿規以為教取經史子集與埤雅小說

之言摘其的對奇語為事類蒙求對偶切要人稱拙翁先生

黎立武

字以常新喻人咸淳間舉進士累官國子司業華文閣待制考試臨川得吳澄時稱其知

人

黎確

建炎中為諫議大夫

黎宿

東莞人敦行禮義鄉人化之剗股以愈親疾旌其門曰孝義

黎靖德

永嘉人嘉佑間為沙縣主簿攝縣事清謹善理繁劇博學能文詞嘗修沙陽志

黎希聲

老蘇友人也
有遠景樓賦

黎公真

甘泉令有仁政後去仕民思之圖其像於學舍

黎載

字仲基臨川人性端重嘗謁草廬於郡學以文章請益先生喜曰期年所接無如君氣節文章

皆善者歷官
太平路教授

明黎貞

字彥暉新會人性坦蕩不羈以詩酒自放號陶
生洪武初署訓導志不樂仕自比嚴光世稱高
士

黎光

字仲輝東莞人博學能文洪武中領鄉薦拜
監察御史正色立朝卓有風裁歷刑部侍郎

黎崇

字好禮南城人居父喪哀毀踰禮啜糜飲水三
日不進鹽菜廬墓側三年不櫛沐終喪猶縞衣

諱日輒哭臨
不止以孝聞

黎公升

字之冕臨川人宣德庚戌由經明行脩薦歷
任蒲圻教諭累典文衡博學洽聞條約以身

先之每夜課諸生業一鼓乃罷雖祁
寒暑雨不少廢士習丕振科第接踵

黎近

字之大甫弱冠遂以著述為事宣德間應文學才行卓然出衆授銅陵丞政教兼舉陞知高安

縣時徭賊據城東南近出榜諭降之負固輒火其巢然御隸太嚴為權奸所忌繫獄十年獄中

作太平鏡歌鼓吹曲太平等頌英廟嘉歎釋之改知泌陽

黎恬

字潛輝宣德進士湖廣人歷官右春坊右諭德

黎淳

字太樸華容人天順進士第一授修撰歷官禮部尚書諡文僖子民表進士雲南叅政

黎福

字天與樂平人成化進士授御史侃侃正色疏天下利病有人所難言者歷鄖陽都御史南京

兵部侍郎天性廉靜不為崖岸求赫赫聲事至必盡心力故所樹立與衆殊

黎禧

陽朔人成化九年由舉人知增城縣立心廉恕刑清政舉士民慕之

黎貫

廣東人正德進士改庶吉士任御史子民表翰林民表吏部

黎興

字師召京山人正德辛未進士

黎龍

字乾德新喻人正德戊辰進士弟鳳弘治進士任御史

黎澄

字本靜樂平人嘉靖丁未進士

黎民衷

字惟和廣東人嘉靖丙辰進士歷廣西叅政死于難

嵇

初徙譙國商音夏少康封子季杼於會稽遂為會稽氏漢

三嵇康

字叔夜其先本上虞人姓奚以避怨徙譙家于銓之嵇山因命氏焉康遠邁不羣與魏宗室婚

拜中散大夫不就常彈琴詠詩以自足後以諧被害兄喜有當世才歷太僕宗正

晉嵇紹

字延祖康子事母孝累官至侍中會河間成都二王舉兵紹從惠帝與王戰于蕩陰侍衛皆潰

惟紹以身捍衛遂被害血濺御衣事定左右欲浣衣帝曰此嵇侍中血勿去

嵇含

字君道紹從子好學能文自號毫丘子舉秀才除郎中惠帝朝為中書侍郎累官至平越中郎

將廣州刺史

宋

嵇穎

字公實宋城人父適石首主簿有仁政穎天聖中進士累官翰林學士王曾張知白嘗見穎諡

厚篤學謂其子弟曰若曹師表也張堯封嘗從穎學文後其女入禁中甚被寵求編次其父藁

為序以獻之穎不答

嵇琬

右朝請郎

明 嵇綱 考城人正德中海鹽知縣

嵇世臣 字思南歸安人嘉靖乙未進士任翰林編修

嘉靖間四川慶符知縣嵇錫德清人庚子舉人萬曆甲戌進士嵇應科武進人

奚 譙國高音夏車正奚仲之後又望出北海

夏 奚仲 居薛為湯左相

周 奚斯 作閼宮詩魯使大夫奚斯求慶父哭而往慶聞其聲自殺

漢 奚涓 元功十八人涓位第七封為列侯

奚意 成陽侯

南奚斤

仕魏為相世稱忠孝封山陽侯

奚康生

河南人少驍武彎弓石十矢異常箭仕魏為直閣將軍吐京胡反命康生等討之四軍俱

敗康生軍獨全追胡至車突谷殺傷數千人

唐奚陟

字尹卿京兆人少篤志通羣書大厯末擢進士文辭清麗科授弘文館校書郎

奚庭珪

精於墨賜姓李

奚賈

常建同時人郎士元亦有送奚賈詩

宋

奚迎泰

長興人景定進士

奚士達

慶元中知嘉興縣

奚和觀

代人冀芮
二州刺史

奚士遜

寧國人與兄士達同舉進士累官至大理卿
會韓侂胄死史彌遠議大獄士遜曰侂胄誠

奸邪若欲加以大逆非士遜所知由是
罷歸子祀亦舉進士佐郡邑有廉能聲

明
奚昌

字元啓吳縣人少遊鄉校有雋聲正統甲子以
易中式十試禮部不中遂易尚書酷好作詩每

大衆中舉手搖足輒為推敲之狀年且五
十中進士卒於京師詩多溜麗膾炙人口

奚銘

宛平人成化間知樂安縣蒞政清勤除弊懲奸
賞罰明信興學校勸農桑百廢修舉民俗大化

擢監察
御史

奚自

順天人弘
治進士

奚良輔

上海人嘉靖乙未進士

卷十四

奚世亮

字明仲黃岡人嘉靖丁未進士授南京戶部主事權稅以廉著肅清紀法條陳便宜歷郎

中改刑部擢知思南府左遷高郵州同知轉福建延平府同知時倭寇闖或止之世亮曰承

平受爵秩臨變而避非忠也單車行日事禦寇移攝興化府倭夷至圍城者踰月世亮與武帥

分城而守親冒矢石拒之南城陷亮猶西向迎戰身被數鎗死之一二月寇平始得遺骸於旗

亭事聞贈右叅

議蔭子諭葬

西

門豹之後改為西

宋

西達

字善卿濮州人邵武推官

元

西漢傑

葉縣人累官至禮部尚書封南陽郡侯

明

西寧

弘治元年金山衛指揮守備汀州

西華

陝西人正德中任萊州府通判

西穎

宿州人正德中臨海縣丞

嘉興秀水有西氏

邽音圭

周邽巽

魯人孔門弟子後世追封濟陰侯

明

邽仲德

陝西人弘治舉人任廣平府學訓導

注音圭望出南陽

漢注丹

字子玉涑陽人世傳孟氏易專志教授徒衆數百人建武初為博士歷遷大鴻臚作易通論七篇世號注君通丹學義研深易家宗之稱為大儒

唐

注炫

洪州幕府

犀

見氏族志

周

犀首

公孫衍也

犀武

魏相

明

犀希古

獲鹿人嘉靖中益縣主簿

梨

明梨公弁

宜黃人正統中
任建陽縣訓導

沂

元沂川

沐陽尹規制縣治招徠流民教
之樹藝興學崇師民俗以變

畦

漢畦覩

稽

音雞黃帝臣太山稽之後

周

稽黃

秦賢
人

漢

稽發

貨殖傳

宋

稽聳

高郵人所居為稽家莊時聳知天祥匡復大志迎事之使子德潤等護至泰州由通航海達行

在柳岳奉降表詣元人過莊聳憤其賣國殺之

稽應龍

嘉定進士吉水人

稽原

字子長崑山人嘉定進士

稽琬

散騎都尉

元稽適

為石首縣主簿民有父子坐重辟者府下適按之適得其情父抵法而子免死其人感頌之曰

主簿仁人也當令生子明年果生子且穎敏天厯中及第

明稽列祥符人宣德中弋陽縣丞

稽昭崑山人正統中任灤州知州涉獵古今蒞民得體

稽元鳳常熟人正德舉人

稽源灤州人正德中臨淄縣主簿

提

周提彌明晉靈公宴盾伏甲將殺之其御彌明知之趨登曰臣侍君宴過三爵非禮也遂扶以下公

喉犬彌明殺之闕且出卒死之

雞

明雞鳴時

字子信遷安人正統中陝西苑馬寺監正

寬

明

寬濟

福山人正統中雲都知縣

嵐

下珪反見氏族志

五代嵐閣

將梁

羸

音迎見直音

昴

音黎蜀有刁達避難改焉又百濟八姓其三曰昴

氏

夷姓

鞮 東鞮之後風俗通云晉有銅鞮不華之後

題 見韻會

鄆 東海之邑

僊 齊卿高僊之後

院 即古隄字見姓苑

勃 音藜地名又姓見直音

適 本銅鞮氏避事改焉同州多此姓

泥 楚大夫卑泥

齋商音

緊見姓苑

萬姓統譜卷十四

欽定四庫全書

萬姓統譜卷十五

明 凌迪知 撰

上平聲

九佳

懷 河內角音無懷之後

三懷叙仕吳為
國尚書郎

晉懷瑤
人崑山人

宋懷芑
陳州人政
和登科

明懷信

嘉興人永樂舉人

懷進忠

日照人洪熙中鴻臚寺序班

懷敬

西華人永樂舉人

懷寬

井研人宣德中大埔縣丞

懷海

嘉興人景泰舉人

柴

平陽商音姜姓齊文公子高之後後有柴高子孫以爲氏

周柴高

字子羔孔子弟子

漢柴武

陳蒲侯

晉柴文晉陽太守

唐柴紹字嗣昌尚唐高祖平陽公主公主與紹助太宗定天下號娘子軍吐谷渾黨項冠邊紹禦之矢

下如雨紹彈琵琶二女對舞虜停射紹從後擊之大潰

柴再用光州刺史天祐初朱全忠攻淮南抵光州再用嚴設守備俟其渡淮而北抄其後軍斬獲

萬計

柴克弘再用子為大將伐吳越

五代柴守禮堯山人與周太祖郭威同里妹歸周祖為后后無子以守禮之子為子是為世宗守禮徙

居洛陽終世宗之世未嘗至京第以元舅禮之

宋柴禹錫

大名人少時有客見之曰子質不凡若輔以經術必至將相由是留心學政事太宗累官

至樞密副使後授鎮寧軍節度使知涇州卒贈太尉

柴中行

字與之江山人舉紹興進士時有司薦舉以伊洛為偽學中行曰自幼習讀程氏易傳如謂偽不願考校士論壯之屢遷知贛州請老與弟中守中立講學南溪之上時從游者數百人

因稱之曰南溪先生

柴淵

字益深永豐人蚤從呂東萊游其學必以聖賢為師表親年方四十即不應舉

柴宗慶

字天祐尚太宗魯國公主封千牛衛上將軍禹錫子

柴成務

曹州濟陰人父自幼能詩舉進士官至兵部員外郎成務博聞稽古有聲詞學登進士甲

科歷官中外皆有能名真宗時
遷至給事中終判尚書刑部

柴涓

字浩然以蔭至通直郎知鄂州崇陽縣靖康元年京城被圍羽檄召天下兵鄂部縣七當發二

千九百人皆未集涓獨以所募六百銳然請行
出家錢買牛酒激犒之即日引而東北過淮蒲
圻嘉魚二縣之兵始至涓馳先犯鋒鏑乘勝追
北十餘里大與敵遇飛矢蝟集二縣兵亟舍去
涓創甚猶血戰遂
死焉贈朝奉郎

柴禹聲

字元振衢州人受業於楊龜山屢魁鄉薦學
者宗之紹興間高擢國子司業以公堪充

史館特薦于朝兄禹功字懋績晚亦遊
龜山之門人稱其昆弟皆知所學云

柴宗愈

衢州布衣也紹興中
獻中興聖統詔免解

柴元祐

字益之通五經尤長于易以窮理盡性為本四方從學者衆湯漢李伯玉饒魯皆其門人

學者稱曰強恕先生所著春秋尚書論語解易繫中庸大學說史宋名臣傳

元

柴潜道

襄陵人博極羣書工于詞翰志尚高不樂仕進教授鄉閭以德義陶其後進人號為靜莊

處士

明

柴虎

國初以功陞指揮副使從叅政朱亮祖討方國珍守温州

柴望

字宗禮錢塘人為人樸茂不事表暴見義事輒為友括蒼金觀者前元明州學官元亡退居錢

塘母歿貧不能葬以哀毀歿而其妻繼殞宗禮哭之曰吾友之不幸至是哉子且孱弱三喪在前吾責也乃捐貲治喪事及告于觀所常往來者因得舉從其先兆葬焉人義之而目為柴義

士杭州府儒學教授徐一夔為著
柴氏義事記子車官至兵部尚書

柴車

字叔興望之子洪武中領鄉薦永樂二年授兵部主事進員外郎郎中累官本部侍郎正色率

下人敬畏之宣德間將兵征西戎有功陞本部尚書累受制敕褒獎

柴震

字景春烏程人永樂甲申由國子生授兵科給事中遷至大理寺少卿廉介不苟人不敢干以

私卒囊
紫蕭然

柴世需

字元功忠之子也中鄉試亞元有文名尤長詞賦更善真草隸篆選任中書纂修國史書

成遷工部司務督修各內苑工程綜理詳密為時所重陞本部員外郎

柴文顯

建德人幼習學業尤精於中庸號柴中庸正統十年進士巡按福建激濁揚清一道畏服

凜然有范張攬轡埋輪之風

柴昇

字公照內鄉人成化進士正德中任吏部左侍郎南京兵部尚書叅贊禮務

柴伸

雲南人弘治中任龍門知縣才行卓異惠政及民城池公署多所建立後卒于官民立木主以

祀之嘗著愚牧解為人傳誦

柴經

字季常鄞人生而秀穎績學藝文輒能屈其先輩以書魁正德庚午鄉試丁丑舉進士授刑部

主事凡冤獄必滿雪惟允有鄭生者以冤陷獄監司嫌其富不為理經竟直之沅州判官恣酷墨會與當路寅緣無敢問者經輒按治如法歷遷南京都察院右副都御史提督操江飭兵政明體統清卒伍增戰艦補操戍嘗視院篆兼署大理寺會法司有為言官修故怨者文致人死

罪池州守亦為前守滅仇家且藉其貲株連者
十數輩經皆平反之故諸人銜入骨因嗾言官
攻之當道不察竟落籍以歸經天性孝友事父
母盡孝撫愛諸弟不遺餘力每俸入必均分之
居官門無私交臨大事決大疑侃侃不回而以
一言定是非人有過不宣有一善即揚之故人以
皆稱為長者

柴奇

字德美崑山人正德辛
未進士歷順天府尹

柴儒

字伯禎白河人正
德進士歷叅政

柴義

字時中仁和人弘治
乙丑進士歷通政

嘉靖丙辰進士

柴淶鄞縣人歷布政
司
柴祥仁和人任御史

淮見姓苑

明淮錫

臨汾人嘉靖中通州同知

淮入相

關太平府推官中

槐望出廣漢富父槐之後以王父字為氏

唐槐元敬

槐承榮

屯田員外郎

槐公儉

貞元進士揚州人

宋槐京

尚書郎

明槐寅

福清人萬歷間四川都指揮

鮭

闕

居鮭陽本圭姓改為鮭氏

漢鮭湛雲

閬州人國子博士

佳

角音

街

見姓苑

皆

闕

萬姓統譜卷十五

欽定四庫全書

萬姓統譜卷十六

明 凌迪知 撰

上平聲

十灰

裴河東商音羸姓伯益之後秦非子之孫封裴鄉侯以邑為氏

周 裴陵僖王封解邑君河東聞喜俱陵裔

漢 裴潛聞喜人仕為代郡守時烏桓驕恣前守不能治潛單車之郡撫以恩威遂皆讐服後為尚書令

裴遵侍中從先武平隴蜀世居河東曾孫茂為侍中尚書生二子長曰徽號東眷次曰微為西眷後

徽曾孫天
明號中春

裴瑜

字矩璜聰明敏達舉孝廉太守史弼被侯覽誣檻車徵弼吏人莫敢近者唯瑜送至清澗大言

於道傍曰明府摧折虐臣選德報國如其獲罪足以垂名願不憂不懼弼曰誰謂荼苦其甘如薺瑜后官至尚書

三裴秀

字季彥潛子兄茂仕魏為侍中尚書秀少好學八歲能屬文時語曰後進領袖有裴秀仕魏為

黃門侍郎散騎常侍嘗改定官制及作禹貢地圖累封至濟川侯

晉裴楷

字叔則秀從弟容儀俊典博涉羣書少與王戎齊名武帝時累官散騎侍郎後遷中書令終開

府儀同
三司

裴頠

字逸民秀子弘雅有遠識博學稽古惠帝時為國子祭酒累遷尚書侍中後為趙王倫所害晉

俗尚虛無頠著
崇有論以矯之

南裴駿

字神駒聞喜人父雙碩後魏弘農太守駿幼聰慧兵亂襲聞喜駿率鄉豪奔赴太武補中書博

士崔浩目為三河領袖後
轉中書侍郎卒贈聞喜侯

裴敬憲

駿從孫學博才清後魏時舉秀才高第除太學博士工隸草解音律世有德於鄉賦過其

宅輒相約不犯弟莊伯有才器博識
多聞後魏臨淮王引為記室叅軍

裴松之

字世期聞喜人仕劉宋為中書侍郎博覽墳籍立身儉素註三國志其子駟註史記

裴粲

河東聞喜人北魏肅宗時為西兗州刺史出帝初為膠西太守時亢旱士民勸令禱於海神左

右曰例皆拜謁粲曰安有方伯而致禮海神也卒不拜時耿翔寇亂三齊乘粲無備掩襲殺之

裴延雋

字平子聞喜人少孤孝事後母涉獵墳典後魏時舉秀才累官至幽州刺史考績為天下

最後歷
中書令

裴佗

聞喜人五舉秀才再舉孝廉以高第除中書博士再遷趙郡守為政有方佗性剛所交皆名勝清白任真不事家產子讓之為北齊清河守

裴果

字戎昭聞喜人祖思賢父遵皆刺史果慷慨有志略為後魏平陽郡丞以征討功授河北郡守後從周文帝戰河橋勇冠當時進爵為公

裴寬

字長寬聞喜人祖德歡魏中書侍郎寬弱冠以孝友稱仕西魏歷散騎侍郎授都督與東魏戰

被擒遁還後
封夏陽縣男

裴俠

字嵩和解人祖思齊拜議郎父欣西河守俠七歲始能言聰慧異常從西魏文帝戰沙苑以功

進侯爵後為河北郡守清慎奉公
號獨立使君後周時進爵為公

裴子野

字幾原松之孫少好學善屬文天監中為諸暨令不行鞭罰民有爭者示之以理百姓稱

悅合境歡然撰宋略二十卷梁武帝以為著作
郎子野久在禁省默靜自守及歸妻子不免饑
寒人以師
道推之

裴邃

河東人仕梁累官廣陵太守深沉有志略歷北
梁秦豫三州刺史為政寬明能得士心居身方

正有威重及卒淮
肥之間莫不流涕

裴文舉

聞喜人西魏時為著作郎周孝閔踐祚襲澄城縣子累遷絳州刺史後入為司憲中大夫

進爵

為伯

裴叔業

聞喜人少有氣幹以將略自許仕北齊累遷黃門侍郎封武昌縣伯後拜徐州刺史封蘭陵

郡公

裴昭明

齊永明中為廣陵太守罷郡無宅常曰一身之外復何須乎子孫不才我聚彼散若能自

立不如
一經

裴讓之

佗子字士禮清明俊別早得聲譽魏時舉秀才遷主客郎中省中語曰能賦詩裴讓之與

楊惜友善清談竟日惜每云此人風流警拔裴文季為不亡矣歷中書舍人容儀醞藉齊文襄

目之曰士禮
佳舍人也

裴安祖

駿從弟少聰慧年八九歲就師誦詩至鹿鳴篇語諸兄云鹿得食相呼而況人乎自此未

曾獨食魏孝文時弱冠辟州主簿人有兄弟爭財詣州相訟安祖召其兄弟以禮義責讓之此

人兄弟明日相率謝罪州內欽服之

裴瓚

字國寶中書郎風神高邁見者皆敬之時為王綏所重每從其游綏父戎謂之曰國寶初不來

汝數德之何也對曰寶國雖不知綏綏自謂知國寶楊駿之誅為亂兵所害

裴憲

字景忍少而穎悟好交輕俠及弱冠更折節嚴重修尚儒學足不踰閭者數年初侍講東宮歷

黃門吏部郎侍中王浚承制以憲為尚書永嘉末王浚為石勒所破棗嵩等莫不謝罪軍門貢

賂交錯惟憲恪然私室勒召而問之曰王浚暴虐孤恭行乾憲拯茲黎元慶謝交路君獨傲威誠信阻絕防風之戮將誰歸乎憲神色侃然泣而對曰臣世荷晉恩王浚凶粗尚晉之遺藩且武王伐紂表商容之間未聞商容在倒戈之例也明公使不欲以道化厲物防風之戮臣之分也請就辟石勒深嘉之出為長樂太守後為先祿大夫司徒太傅憲在朝玄默未嘗以物務經懷但以德重名高動見尊禮竟卒于石氏

裴之高

字如山遷堂兄髡之子頗讀書少負意氣隨叔父遷征討所在立功甚為遷所器重後遷

卒之高仍除梁郡太守時侯景作亂之高之弟之悌在侯景中或傳之悌斬侯景元帝使人報之高之高竟無言直云賊自殺賊非之高所聞元帝深嗟其介特進金紫光祿大夫

裴之橫

字如岳之高弟少好賓游重氣俠不事產業

橫嘆曰大丈夫富貴必作百幅被遂與僮奴數百人于芍陂大營田野遂致殷富簡文在東宮聞而美之以為河東王常侍後隨僧辨破侯景又破武陵王除吳興太守乃作百幅被以成其志

裴之禮

字子義遷之子美容貌能言玄理為西豫州刺史母憂居喪惟食麥飯遷廟在光宅寺堂

宇弘敞松柏鬱茂武帝南郊道經遷廟顧而嘆曰裴可為更生矣時都下旱蝗四鄰門外桐柏凋盡惟遷墓不入當時異之歷位黃門侍郎

裴忌

字無畏河東聞喜人少而聰敏有識量頗涉史傳為當時所稱侯景之亂乃隨高祖征討及高

祖誅王僧辨僧辨弟僧智舉兵據吳郡高祖命
忌勒部下精兵自錢塘直趨吳郡夜至城下鼓
譟入據吳城高祖嘉之表授吳郡
太守累遷衛尉卿封東興縣侯

裴延雋

字平子河東聞喜人少孤事母以孝聞涉獵
墳史頗有才辨舉秀才射策高第除著作佐

郎累遷太子洗馬明帝時遷幽州刺史范陽郡
有舊督亢渠徑五十里漁陽燕郡有故陵諸竭
廣三十里皆廢毀莫能修水旱不調延雋乃表
求營造遂躬自履行相度形勢分督未幾而就
溉田百萬餘畝為利十倍百姓
賴之考績為天下最拜太常卿

裴鴻

寬之族弟少恭謹有幹略歷官內外天和初拜
郢州刺史轉襄州總管府長史賜爵高邑縣侯

從衛公直南征軍敗遂沒尋卒于
陳朝廷哀之贈豐資二州刺史

裴澤

聞喜人頗有文學孝昭初齋師奏舍人孝昭崩魏收議諡為恭烈皇帝澤正色抗論曰魏收死

後亦不肯為恭烈之諡何容以擬大行且比皇太后不豫先帝殮寢失常聖躬貶損今者易名必須加孝遂改為孝昭忤旨出為廣州司馬尋歷位中書侍郎後為清河郡守執政疾其祖珽之黨與崔李舒等同見誅澤本勁直無所為避然好戲笑無規檢故頻敗

裴諏之

字士正讓之弟少好儒學釋褐太學博士嘗從常景借書百卷十許日便還景疑其不能

讀每卷策問應對無遺景歎曰應奉五行俱下稱衡一覽便記今復見之于裴生矣楊惜合門合葬託諏之頓作十餘墓誌文皆可觀獨孤信入據金墉以諏之為開府屬號曰洛陽遺彥信敗諏之居南山後為大行臺倉曹郎中卒贈徐州刺史

裴讞之

字士平，諷之弟。七歲便勤學，早知名。累遷司徒主簿。雖年少，不妄交游。惟與辛術、李繪、李

構、崔贍為忘年友。轉儀曹郎，尤悉歷代故事。儀注喪禮，皆能裁正。為許昌太守，賓客過郡，出私財供給，無賦于民。去日為百姓所懷。

裴訥之

字士言，諷之弟。純謹有局量，弱冠為平原公開府墨曹掌書記。從至并州，其母在鄴，忽得

心痛，訥之是日不勝思慕，心亦驚痛。乃請急而還，當時以為孝感。

裴謁之

字士敬，訥之弟。少有志節，好直言。文宣末年，昏縱朝臣，罕有言者。謁之上書，正諫言甚切。

直文宣將殺之，白刃臨頸，謁之辭色不變。帝曰：「癡漢何敢爾！」楊愔曰：「此子望陛下殺之，以收後世名。」帝投刀曰：「小子望我殺爾，以取名。我終不成爾名也。」遣人送出。

裴譚

叔業孫孝事諸叔能盡子道國祿歲入每以分贍世以此稱之位輔國將軍中散大夫

裴衍

字文舒優于學識事親以孝聞兼有將略仕齊為陰平太守廉貞寡欲善撫百姓人吏追思之

孝昌初拜相州刺史

裴芬之

字文馥長者好施篤愛諸弟仕齊位羽林監入魏以父勲封上蔡伯為東秦州刺史在州

有清靜稱後徙封山荏縣遷岐州刺史為隴賊所圍城陷賊以送上邽為莫折念生所害贈青

州刺史

裴植

字文遠叔業兄子小而好學覽綜經史尤長釋典善談理義隨叔業在壽春叔業卒教命處分

皆出于植于是開門納魏軍詔以植為兖州刺史入為大鴻臚卿再遷度支尚書加金紫光祿

大夫後為常伯昕矯詔殺之朝野稱冤
故吏渤海刁冲上疏訟之贈尚書僕射

裴徽

兄弟子姪八人善通文禮時人以方八王徽比
王禪楷比王衍康比王維綽比王澄贊比王敦

避比王道顏比
王戎邈比王玄

裴伯茂

博涉羣書文藻富贍為中書侍郎及卒
魏收賦詩云臨風思君度對酒想公榮

裴漢

字冲霄在魏除相府墨曹理職明瞻斷
决如流相府語曰目下繁爛有裴漢

隋裴肅

字貞亮開皇中見皇太子勇廢黜上書請復上
謂楊素曰肅憂我家事如此亦至誠也於是徵

肅入朝煬帝嗣位謫永
平郡城甚得夷人心

裴政

字德表開皇中為襄州總管妻子不之官所受
秩俸散給寮吏人犯罪者陰悉知之或竟歲不

發至再三犯乃因都會時於衆中召出親案其罪五人處死流徙者甚衆合境惶懾令行禁止

稱為神明

裴矩

佗孫學涉經史高祖即位擢給事中轉吏部侍郎名為稱職煬帝時與聞政事多厯歲年後雖

處危亂未虧廉謹之節

裴蘊

聞喜人隋初平陳超拜開府禮賜優給厯洋真等州刺史考績連最後擢御史大夫

唐

裴寂

蒲州桑泉人仕隋歷侍御史晉陽宮副監贊唐高祖起義兵及高祖即位累遷尚書左僕射拜

司空卒贈河東郡公

裴懷古

壽州壽春人清介審慎仕為監察御史多所平反累官左威衛大將軍韓琬稱其馭士信

臨財廉為
國名將

裴行儉

字守約聞喜人貞觀中舉明經仕為長安令高宗時累遷吏部侍郎典選有知人之明後

拜禮部尚書
卒諡曰獻

裴琰之

聞喜人永徽中為同知司戶叅軍年甚少積案數百省決一日畢號霹靂手後為永年令

有惠政子淮舉明經遷監察御史睿宗當早造金仙玉真二觀淮諫止開元中拜吏部尚書

裴炎

聞喜人寬厚有奇節明經及第拜中書令武后廢中宗炎固爭請歸政后大怒捕繫獄坐死流

南嶺

裴敬彝

聞喜人性警敏七歲能文唐高祖時為監察御史後歷太子左庶子武后時為酷吏所陷

死嶺南

裴守真

稷山人舉進士六科連中天授中為司府丞以忤旨出為汴州司馬後為寧州刺史吏民

懷其政子子餘中明經累官冀州刺史次子耀卿擢童子科累官京兆尹拜同平章事充轉運

使置河陰集津三門倉省運費三千萬緡

裴冕

河東縣人調渭南尉玄宗入蜀拜御史中丞後肅宗至靈武與杜鴻漸等同勸進以功拜左僕

射自製巾子人爭效之號僕射巾

裴寬

琰之從子舉拔萃科累官河東刺史州久旱寬入境輒雨徙河南尹不屈附權貴拜禮部尚書

卒寬兄弟八人皆擢明經任臺省州刺史子諝擢明經代宗時為河東相庸鹽鐵使

裴胄

字盾叔寬姪擢明經佐李抱玉鳳翔幕府抱玉劾貶桐廬尉時李栖筠觀察浙西幕府皆一時

高選取胄為之使引胄拜殿中侍御史尤為元載所惡會栖筠卒胄護喪歸洛陽人為危之胄屹然不沮後載誅始拜刑部員外郎遷宣州刺史贈尚書右僕射諡曰成

裴遵慶

聞喜人強學談經天寶中代宗朝累官尚書右僕射知選事每薦賢有來謝者輒以為恥

諫疏皆削其藁所著有王政記

裴潏

聞喜人篤學善隸書元和初擢左補闕遷起居舍人憲宗喜方士潏舉秦漢事以諫帝怒貶江

陵令穆宗立召拜刑部郎中卒諡曰敬

裴垪

聞喜人罷局峻整舉進士四遷考功員外郎翰林學士憲宗朝拜中書侍郎集賢殿大學士垪

引李絳崔羣與同列及擢裴度等知制詔

裴度

字中立聞喜人貞元初進士累官中書侍郎督兵討平淮蔡策勲封晉國公加中書令卒諡文

忠度以身係天下輕重者三十年歷事四朝以全德終始天子識大理卿諡為學士

裴識

涇原節度使鎮平梁治保障整戎器開屯田立限戍邊將士歲限滿者就近戍由是人人感悅

裴行立

貞元中為桂管觀察使善政及民盜遁奸革民懷其德立祠祀焉

裴子雲

新鄉令邑人王恭戍邊留犝牛六頭於舅李璉家五年產犢三十頭恭還索牛璉曰爾牛

已死其半止還三頭恭訐之子雲收入獄捉璉至曰賊盜牛三十頭藏爾莊內即拷之璉急曰吾牛實外甥犝牛所生於是五頭酬璉餘盡還恭

裴光庭

字連城初吏部求人
不以資考為限其後士
人猥衆專務起競銓品
枉撓光庭懲之因行

儉長名榜乃為循資格
任門下省主事閭麟之
專主過官凡麟之裁定
光庭輒然可時語曰麟

之口光

庭手

裴休

字公美孟州人不為
瞰察行所治吏下畏信
能文章書楷道媚有體
法為人醞藉進止雍閒
宣

宗嘗曰此
真儒者

裴耀卿

字煥之遷相王府典
籤更直備問府中號學
直

裴諝

字士明擢明經遷考功
郎中代宗幸陝諝徒步
挾南曹印赴行在帝曰
疾風知勁草果可信

裴旻

為將軍請吳道子畫天
宮寺吳請旻舞劍作氣
以助揮毫旻舞一曲道
子奮筆立成如有神助

裴由先

未冠推蔭為太僕丞兄炎死坐流嶺南上變求面陳得失武后召見盛氣待之曰炎謀反

法當誅尚何道由先對曰陛下唐家婦身背先帝顧命今雖臨朝當責任大臣須東宮年就德成復子明辟奈何遽王諸武斥宗室炎為唐忠臣而戮逮子孫海內憤怨臣愚謂陛下宜還太子東宮罷諸武權不然豪傑乘時而動不可不懼后怒命曳出杖之朝堂命流濃州中宗復位召還為吏部尚書

裴向

同州判官後為櫟陽渭南令奏課第一

裴禎

光庭子也以蔭仕累遷起居郎開元末壽王瑁以母寵欲立為太子禎陳申生戾園禍以諫立

宗改容謝之詔授給事中禎曰陛下絕招諫之路為日滋久今臣一言而荷殊寵則言者將衆

何以錫之帝善其讓止不拜

裴嚴

壽春人舉賢良方正策第一拜拾遺辭章峭麗

京兆尹強幹不阿貴勢後為翰林學士

裴知古

善樂律為太樂令神龍元年正月享太廟樂作知古密語萬年令元行冲曰金石諧婉將

有大慶在唐室子孫乎是月唐中宗復位人有乘馬者知古聞其嘶乃曰馬鳴哀主必墜死見新婚者聞珮聲曰終必離訪之皆然

裴坦

字知進居太平里號太平宰相子娶楊收女齋具多金玉命輟之曰曰亂我家法

裴覺

長安人光啓中為杭州刺史屬董昌作亂兵興道阻覺遂留家于杭子堅仕吳越錢氏累官至

丞相

裴璩

諸之從曾孫也乾符四年為浙江鎮海節度使值浙西狼山鎮遏使王郢作亂璩密招其黨朱

實降之散其從六七十人郢奔明州五年曹師雄寇湖州璩遣兵擊破之後官太師

五代裴迪

河東人為入明敏善治財賦精於簿書梁太祖用兵四方留迪以調兵賦太祖自岐還將吏皆

賜迎鑾協贊功臣太祖曰協贊之功惟裴公有之他人不足當也

裴睪

河東人仕唐為禮部侍郎每陳朝廷闕失宰相桑維翰睪所放進士維翰過睪睪不迎送人問

之曰桑公於中書庶寮也桑公見我於私第門生也何迎送之有

裴約

唐澤州刺史時李繼韜以潞州留後叛降梁來攻澤州約泣以諭眾曰吾寧死不從也嬰城自

守城陷死唐主憫其忠為立祠焉

宋

裴濟

咸平初叛知靈州兼都部署至州二年謀緝八鎮興屯田之利民甚賴之其年清遠軍陷夏人

大集斷饒道孤軍絕援濟刺指血染奏求救甚急兵不至城陷死之

裴子良

皇祐間知黎州儂智高反聲言入南詔犯蜀州人危懼裴能鎮撫安堵

裴莊

字端已咸平二年契丹犯塞命為河北轉運使時傳潛統大軍駐定州北莊屢條奏其無謀未

幾徙知宣州會詔百辟上封直言

元

裴居敬

蒲州人累官雲南行省叅政居敬積學勵行家蓄書至二萬餘卷

明裴承祖

長陽人洪武中以秀才異等拜監察御史命同御史長亨等八人署都察院事承祖劾奏

武定侯郭英私蓄家奴擅殺皇上命議其罪已而宥之尋出為浙江僉事治獄平允不事苛刻

擢江西按察使

裴冕

山東壽光人由監生洪武二十九年任建寧府知府廉靜公勤愛民禮士去後民懷之

裴璉

監利人洪武間知劍州歷浙江江西僉事執法不撓被誣去尋起為御史以平寇功陞河南副

使免官再起為御史改刑部主事官至刑部侍郎

裴綸

監利人璉子永樂辛丑一甲第三名授編修歷禮部尚書諡文僖

裴斐

字成章渭南人性聰敏好學正統舉人授御史立朝有風采出按遼陽將領振肅士卒悅服歷

按察司僉事

裴慧

字悟理器宇宏深舉止莊重天順進士歷官戶部郎中為人篤慎老練人稱長者歷山東左叅政

裴紹宗

字伯修斐之孫正德進士歷兵科給事中立朝正直尋以諫死死之日貧不能治喪人莫不稱其忠直清謹

裴宇

字子大山西澤州人嘉靖進士歷官禮部尚書

裴紳

字子書蒲州人嘉靖進士歷布政使

裴天佑

字大榆人嘉靖進士歷大理寺少卿

隆慶戊辰進士裴應章福建清流人萬曆間歷兵科給事中

梅汝國羽音殷後紂時有梅伯以國為氏

漢梅福

字子真九江壽春人少學長安明尚書穀梁春秋為郡文學補南昌尉上書言事及王莽顯政

福一朝棄妻子去人傳以為仙其後人有見福於會稽者變姓名為吳市門卒云

梅銷

安化人高祖時吳芮為衡山王銷為芮將功最多封十萬戶為列侯食臺以南諸邑謂之臺侯

後芮徙王長沙以忠謹著聞延賞傳世銷匡輔之力也銷子孫多居曲江臺嶺因銷得名梅嶺

三梅敷

魏將

晉梅盛

字昌圖仕晉為章安令擢南昌別駕知晉將亡即是邑而隱焉人稱為梅長者

梅陶

居鄉里立月旦評祖約問其意何如答曰善褒惡貶佳法也

梅頤

嘗因事拜陶侃侃止之曰
梅仲真膝豈可再屈耶

宋

梅詢

宣城人舉進士博學有辭辯初為利豐監判官
真宗奇其占對召試直集賢院屢言邊事官至

翰林侍

讀學士

梅堯臣

字聖俞詢從子工為詩歐陽修以為詩友初
以蔭為河南主簿歷鎮安判官仁宗召試賜

進士出身為國子監直講遷都官員外郎卒堯
臣家貧喜飲酒與物無忤賢士大夫多從之遊
嘗註孫子撰唐戴記
及宛陵集四十卷

梅應發

廣德人舉進士歷仕兩朝累官三學橫經王
邸秉筆都曹勵忠貞務廉退仕至直寶章閣

爵廣德

縣男

梅執禮

字知勝浦江人崇寧間進士欽宗時累官戶部尚書會金人犯闕索金帛

詞

以拒遂被殺後贈資政殿學士

梅應春

廣濟人寶祐丙辰進士為餘干令以趙闕薦陞瀘州安撫使淳祐間進禮部侍郎

梅摯

字公儀新繁人進士性淳靜平居未嘗問生業仕為侍御史嘗力論外戚李用和不宜加平章

事又言張堯佐緣官掖以進恐累聖德仁宗嘗稱其言事有體後歷知數州有奏議四十餘篇

梅成和

涇人登紹興進士調江夏主簿時岳飛討楊么于洞庭安撫使劉守道鄂渚成和徒步之

官劉大嘉賞令督軍餉掌箋表多所裨助賊平授太湖令賑恤流移興舉學校

梅鼎臣

翁源人天聖初進士官至殿中丞子佐天聖五年進士官至藤州守

梅蟠

歸善人元豐中舉進士多才博學鄉人稱曰梅夫子凡惠之江山多所留題詩蓋千篇

元梅寔

宣城人明春秋累官至集慶路總管府照磨至正間大兵圍集慶乏援乃會友人李端曰事急

矣當以死殉國城陷果不屈遂闔門遇害

明梅思祖

夏邑人初從張士誠為中書右丞守淮安本朝相國徐達攻淮安遂降從達屢立戰功進

封汝南侯雲南平乃命思祖署雲南布政司事善撫輯民夷安之

梅應魁

成遠人洪武間為寧波府推官累官至廣東布政使有邵觀奴毆其妻陸氏陸潛之母家

母匿之証觀奴打死久不決應魁鞠之繫其母少女來饋給之曰姊何不出女遂漏言亟獲陸

氏邦人服其明

梅殷

河南歸德人汝南侯思祖從子洪武十一年尚寧國公主建文元年充總兵官鎮淮安燕京兵

入召見尋死於道

梅存仁

婺源人性溫雅沉靜治詩為縣學生每開卷必整肅如對聖賢洪武三十三年貢入太學

授萊州府推官丁憂哀毀盡禮其平居必修飾超然餘裕昆弟相友愛未嘗見其疾言遽色服闋改晉州安平縣知縣持已甚廉卒於官不能歸葬

梅純

成化進士應天府人以身世蔭改任中都留守

梅鶚

字百一宣城人正德丁丑進士平生好觀奇書博綜羣籍為文奇詭出塵一時人多慕之

梅守德

宣城人嘉靖進士歷官左叅政

枚淮陰

周枚被

六國時
賢人

漢枚乘

淮陰人為吳王濞郎中王有異謀切諫不納去而之梁景帝時拜弘農都尉以病免武帝即位

以安車蒲輪
徵之道卒

枚皋

乘子字少孺武帝時上書北闕拜為郎好詆諧善賦頌東方朔揚雄曰飛書持檄則用枚皋

枚赫

江都人淮南王客

枚根

越雋太守

明枚倫

字彥常正統間刑部主事乞歸養久為郎官雍容而已無躁競心時皆賢之陞湖廣叅議

枚應發

吳縣人事母孝母疾弗廖剗股進而愈他日

又疾作發露禱於廷灼肌以代母痛願以已之年與母夕方晦忽開見斗六星惟一星尚隱頃則雲復合入視母母已擁衾坐云有六人來

以水灑之

霍然蘇

雷

馮翊商音方雷氏之後女為黃帝妃生玄枵蓋古諸侯之國又望出豫章

上雷公

黃帝時人

漢雷義

字仲公與陳重為友順帝朝舉茂才讓於重刺史不聽義遂不應命後同舉孝廉同拜尚書郎

時語云膠漆雖堅不如雷與陳

雷被

淮南王太子善劍聞郎中雷被巧召與戲被一再辭讓誤中太子

晉雷煥

妙達緯象晉武時斗牛間常有紫氣張華問煥何祥煥曰寶劍之精上徹于天在豫章豐城縣

華即補煥為豐城令掘獄得二劍送龍泉與華太阿自佩後煥子華持劍過延平津劍躍水但

見二龍各數丈長而去煥子曰先公化去之言張公終合之說其信乎

南雷次宗

字仲倫隱退不受徵辟後徵至都下開館於雞籠山聚徒教授生徒百餘人久之還廬山

又為築室於鍾山謂之招隱館

唐雷萬春

事張巡為偏將令狐潮圍雍丘萬春立城上與潮語伏弩發六矢著面萬春不動潮疑刻

木人謀得其實乃驚遙謂巡曰向見雷將軍知君之令嚴矣

三雷同

蜀將

雷譚

吳宜都太守擁遏上流號令嚴肅威振隣敵

宋

雷德驤

邵陽人周廣順中進士為磁州判官宋初拜殿中侍御史判大理寺言趙普擅增刑名後

官至工部侍郎卒贈太

官職方員外郎

雷德遜

深於易義王元之詩上之云當時直氣壓朱雲老作皇朝諫議臣又題詩野館光泉石講

易新堂動鬼神

雷度

字世則臨川人器識高遠研精於易鄉黨為不義者愧曰世則得無知我乎

雷孚

字保信筠州人政和初登第宰宜春章貢居官清白年八十餘卒贈太子太師

雷有終

德驤子初授萊蕪尉召為大理寺丞出知解州俾有聲稱真宗時以戶部侍郎知益

州討賊有功後拜宣徽北院使有終沉敏善斷歷典藩閫能撫士卒輕財好施家無餘財

雷觀

寧化人靖康間在太學上書言張邦昌不宜重相又云漢陳龜有言三辰不軌擢士為相四夷

不恭拔卒為將此何等時而遽遷貴臣耶其言激切士論韙之

雷宜中

字宜叔豐城人淳祐七年進士第三人由賈似道記室以不合去經略廣東北還奏復吳

潛官及濟邸封爵

雷協

字彥一寧化人以易學知名政和進士調信州上饒尉遷南安軍

雷簡夫

字太簡有鄰之孫隱居不仕仁宗時為樞密使杜衍校書郎會辰州蠻酋彭仕義內寇爭

臣安撫不能定命簡夫往至則督諸將進兵築明溪上下二砦據其險要拓取故省地名為砦

五百餘里
仕義內附

雷說

淳化中知大寧監人戶汲泉強弱相凌說於穴傍創石池以豬之外設橫板三十竅承以修竹

謂之笕筒
人咸稱便

雷湫

長沙人先宗時知宜章有善政民立祠祀之

雷孝友

孚子乾道中以詞賦魁南省開禧末為御史中丞嘉定初除知樞密院事兼叅知政事卒

贈太師

雷應春

字春伯郴人以詩擅名累官監察御史首疏時相繼忤權貴出知全州弗就歸隱北湖後

知臨江軍安靜不擾嘗欲城新淦以備不虞當路沮之及已未之亂臨江倉卒無備人始服其

先見終江東憲所著有洞庭

玉虹日邊盟鶴清江諸集

金雷思

渾源人舉進士累官大理寺持法寬平後同知北京轉運使事嘗註易有易解子淵至寧初進

士甲科累官

翰林修撰

雷淵

至寧中為東平錄事河朔重兵所在驕將悍卒倚外敵為重自行臺以下皆摩撫之淵出入軍

中偃然不為屈不數月閭里間多畫淵像尋遷東阿令

元

雷膺

字彥正思孫淵子幼孤篤學以文章稱中統初為監察御史首以正君心正朝廷百官為言累

遷至江南浙西道按察使致仕徵拜集賢學士卒諡文穆

雷杭

字彥舟建安人與兄機拱以易鳴于時嘗著周易註解行世時稱雷氏易舉浙江鄉試第一人

授儒學提舉遷潮陽縣尹以死事贈奉
訓大夫奉化州知州官其子煜為同知

雷光霆

分寧人家居教授學士程鉅夫詹天遊皆其
徒也嘗註九經輯義五十卷史辨三十卷詩

義指南十七卷至元間遣使徵
拜未幾卒學者稱龍光先生

明

雷填

字原中建安人洪武進士授工科給事中糾劾
無避永樂中巡撫蘇松未及一載封章凡四十

上所言多稱旨明年卒有司
臨其喪惟漸衣半篋而已

雷亮

咸寧人以才學舉薦任湖廣按察
司僉事有賢能之譽士林稱重

雷境

字彥達建安人幼孤事母至孝究心典籍家貧
至無自給裕如也永樂間以孝薦至京師固辭

而歸鄉人從
之受學者衆

雷誠

永樂進士江
西豐城人

雷璵

字有融建安人永樂進士改庶吉士拜監察御史巡按雲南奏劾內使十有九人悉寘於法為

浙江按察司僉事振肅紀綱風裁凜然會處州草寇葉宗滿竊發璵剿滅之尋奉上敕巡視浙江福建江西三省海道歷八載卒于官浙人哀之以詩有除却數函圖籍外別無一物載歸舟之句

雷復

字景陽寧遠人正統進士性資純穎博洽經史任行人擢監察御史出補廣西按察司副使轉

浙江叅政山東布政使召為禮部侍郎改副都御史巡撫山西歷官公正廉能臺綱振肅官履無間言鄉邦仰而敬之

雷仕梅

字元芳建安人成化進士授戶部主事擢浙江僉事陞廣西副使尋陞浙江右叅政致仕

尚書楊旦謂仕梅之大節有三歷官中外囊橐蕭然田廬無所充拓其自處裕如也閉門却掃養高林下足跡不涉公庭其自守凜然也方不入時正不諧俗從容禮法之中其自信確乎不可拔也人以為確論云

雷禮

字必進江西豐城人嘉靖壬辰進士任吏部考功司主事歷浙江提學副使官至少傅太子太

傅工部尚書

雷達

字時漸豐城人嘉靖辛丑進士歷布政使

雷賀

字時雄豐城人嘉靖辛丑進士歷布政使

雷夢麟

字伯仁江西進賢人嘉靖甲辰進士任刑部主事恤刑愛民著讀律瑣言歷山東按察使

萬姓統譜卷十六

欽定四庫全書

萬姓統譜卷十七

明 凌迪知 撰

上平聲

十灰

來

平陽商之支孫食采於邾避難去邑因為氏又望出江都

周

來章

齊人

來英

楚人

漢 來漢

新野人以才力事武帝為光祿大夫副樓船將軍楊漢擊破南越

來歙

漢六世孫父仲哀帝時諫議大夫歙事光武拜大中大夫說隗囂歸漢囂叛復以精兵襲破之

隴右遂安進攻公孫述蜀人大懼使客刺之諡曰節侯歙有信義憂國忘家忠孝彰著子褒嗣

帝嘉歙忠節又封

其弟由為宜西侯

來歷

歙曾孫以公主子為侍中歷遷執金吾太僕時侍中周廣等讒陷太尉楊震歷以其傷害忠良

絕不與交順帝立累遷車騎將軍終大鴻臚弟闕為步兵校尉闕為黃門侍郎

來倉

功臣封猷侯

三來敏

敏之後涉獵書籍善左氏春秋尤精爾雅訓詁仕蜀漢為虎賁中郎將累遷光祿大夫

晉

來艷

晉時為司空

南來嶷

廣陵人幼有奇節侯景陷臺城時祖皓為廣陵守嶷說皓起兵討逆皓曰僕所願也死且甘心

為募勇士耿光等百餘人襲殺景黨董紹先及皓敗嶷并兄弟子姪死者十六人

隋

來護兒

江都人幼立奇節任為大都督以平陳功進位上開府後累擊賊有功進封榮國公江都

之難宇文化及忌而害之

唐

來濟

子少篤志文章舉進士累官中書舍人太子承乾敗太宗問侍臣何以處之濟曰陛下上

不失為慈父太子得盡天年則善矣高宗時累遷中書令帝欲立武氏為后濟諫不可後貶庭

州刺史突厥入寇總兵拒之沒於陣

來整

護兒子驍勇善戰賊云不懼官軍十萬衆只怕榮公第六郎

來瑱

永壽人父曜開元末持節西著名終左領軍大將軍瑒略知書有大志安祿山反瑒守潁川

前後殺賊甚衆以功加防禦招討節度等使封潁國公肅宗末年拜相

來希皓

昭義軍大將以節度詔授之固辭

來子珣

遷遊擊將軍

來鵬

豫章人大中咸通間舉進士有詩集傳于世

宋來之邵

字祖德元祐中為監察御史

明來恭

三原人由貢士洪武中拜監察御史陞僉都御史正色立朝彈劾不避權勢有諛恭者我皇祖

私幸其第見夫人紡綿恭鋤菜遂誅讒而益重恭

來天球

蕭山人弘治進士

來聘

三原人嘉靖乙未進士

來汝賢

字子與蕭山人嘉靖壬辰會魁

崔

博陵角音齊太公生丁公伋伋生叔乙讓國居崔因氏又望出清河

周

崔杼

齊莊公大夫諡武子

崔意如

東萊侯生二子伯基仲牟伯基居清河東武域仲牟居博陵安平

漢

崔駰

安平人父篆王莽時為新建大尹理出冤獄二千餘人駰博學有才著詩賦銘頌二十餘篇

崔瑗

駰子舉茂才為汝南令教民開稻田數百頃為政七年人歌之曰天降神明君賜我慈仁父時薦

其宿德大儒
遷濟北相

崔琦

字子璋安平人以文章博通稱梁冀行多不軌琦作外戚箴以諷冀呼琦問之琦曰昔管仲相

齊樂聞讒諫之言蕭何佐漢乃設書過之史今將軍欲鉗塞士口乎冀因遣琦歸陰使人害之東武城人少樸訥好擊劍尚武事年三十九乃就鄭玄學初從袁紹辟為騎都尉尋歸曹操為尚書甚有威重朝士瞻望操亦敬憚焉

崔琰

字季重清河人少樸訥好擊劍尚武事年三十九乃就鄭玄學初從袁紹辟為騎都尉尋歸曹操為

崔寔

字季子真舉至孝獨行除為郎明於政體史才有餘為五原太守母劉氏有母儀淑德博覽

崔鈞

字季子真舉至孝獨行除為郎明於政體史書傳常教寔以臨民之政寔之善績母有助焉崔氏世有美才兼以沉淪典籍遂為儒家之林靈帝時開鴻都門賣官父烈有重名入錢五百萬為司徒聲譽衰減問于鈞曰吾居三公外議

何如對曰論者嫌其銅臭烈怒舉杖擊之時為虎賁中郎將服武升戴鵲尾狼狽而走烈罵曰死卒撾而走孝乎鈞曰舜之事父小杖則受大杖則走非不孝也父慙而止

三
崔林

東武城人仕魏為幽州刺史遷司空進封安陽亭侯為政多推誠存大體去後民輒見思

晉
崔洪

字良伯博陵安平人高祖寔著名漢代父讚魏左僕射洪清厲鯁直武帝時累官吏部尚書舉

用甄明門無私謁子廓終散騎侍郎亦以正直稱

南
崔綽

洪五世孫少孤學行修明與范陽盧玄平棘李靈俱被徵母老固辭後為郡功曹

崔鑒

綽子有文學仕魏自中書博士轉侍郎出為徐州刺史於州內銅冶為農具兵人獲利爵桐廬

縣子子二合襲爵終常山太守康有膽氣終儀同三司

崔辯

鑒從祖弟學涉經史風儀峻整仕魏為武邑太守政務之暇專以勸學為急卒諡曰恭子景雋

知古博學累官員外散騎侍郎雅為孝文所知重景雋子巨倫有文武藝累功封漁陽縣男

崔仲哲

鑒孫兄忻有世幹魏尚書左丞仲哲蚤孤為祖母宋所養六歲宋亡帝慕不止性恢達常

以將略自許累功賜爵安平縣男

崔挺

辨從父少好學五世同居魏孝文帝拜光州刺史風化大行及卒州故吏聞者莫不悲感挺歷

官三十餘年家資不益子孝芬早有才識累官尚書東道行臺孝偉為趙郡太守有惠政

崔景真

瑛六世孫仕北齊為平昌太守有惠政及去民立祠祀之姪祖思有志氣好讀書仕為內

史屢陳政事官至青冀二州刺史為政清勤

崔祖思

字敬元，瑛七世孫。初為都昌令，遷齊內史。高

祖匡社稷，執股肱之義。君子愛人，以德不宜。如

崔徽

此及帝受禪，除黃門侍郎。後為青冀二州刺史。安王範鎮長安，世祖以徽為散騎常侍，督雍、涇

梁秦四州諸軍事。徽為政務存大體，講論道義，誨誘後進，終日不止。

崔振

挺弟，少好學，居家孝。為宗族所稱。仕魏為秘書中散，以謹敕為孝文所知。尋兼尚書左丞，子朗

終侍御史

崔楷

字季則，辯子。性嚴烈，能摧挫豪傑。時人語曰：「莫鴟解付崔楷後。」調殷州刺史，州賊蠡起，攻城楷

不屈被害，贈侍中。

崔伯謙

字士遜鑒從孫東魏高歡召補相府功曹稱之曰伯謙清直奉公真良佐也嘗為濟北鉅

鹿太守威德大行伯謙少讀經史容止儼然親賓至則置酒相娛清言不及俗事卒諡曰懿弟

仲讓仕西魏官

至鴻臚少卿

崔士謙

楷子仕西魏為利州刺史深曉政術吏民愛畏後遷江陵總管外禦強敵內撫軍民風化

大行號
稱良牧

崔懷順

清河東武城人父邪利魯郡太守宋元嘉中沒於虜懷順聞之蔬食如居喪禮泰始初淮

北陷沒懷順因北至柔乾邪利時已卒懷順絕而復蘇載喪還青州徒跣冰雪而手足不傷人

以為
孝感

崔靈恩

清河東武城人習五經尤精三禮三傳仕魏為太常博士歸梁為步兵校尉兼國子博士

先是儒者論天執渾蓋二義不合靈恩立義以渾蓋為一集註毛詩注周禮制三禮義宗左氏經傳義左氏條例公羊穀梁文句義皆行于世

崔昂

字懷遠孝芬姪幼孤事母孝孝芬嘗曰此兒吾家千里駒也東魏時攝京畿長史事入北齊累

遷散騎常侍兼大司農卿校理有方下無奸偽深為文宣知賞朝之大事多委任之

崔暹

字季倫供之後事北齊累官左丞吏部郎好薦人才官至尚書僕射暹憂國如家以天下為己

任文宣常曰崔暹清平天下無雙也

崔仲方

字不齊博陵安平人少好讀書有文武才幹年十五周文見而異之令與諸子同就學時

高祖亦在其中由是與高祖少相款密後以明經為宇文護叅軍以軍功授平東將軍時周武陰有滅齊之志仲方獻二十策帝大奇之從武帝攻晉州遂下之又令仲方說下翼城等四城進爵范陽縣侯宣帝嗣位為少內史帝崩高祖為丞相與仲方相見握手極歡仲方亦歸心焉及受禪上召仲方議正朔服色事後進位開府

崔寬

字景仁初寬通款見崔浩浩與相善次厚存接之反浩誅以遠來踈族獨得不生遂家于武城

居司空舊墟以一子繼浩襲爵武陵公寬性滑稽誘接豪右善撫納招致百姓樂之諸鎮之中號曰能政及解鎮人人追戀詣闕上疏者三百餘人

崔子約

五歲喪父不肯食肉後喪母居喪哀毀骨立人云崔九作孝風吹即倒兄子度死百日不

入房長八尺餘姿神雋異為平原公開府祭酒
與兄子瞻俱詣晉陽寄居佛寺瞻長于子約二
歲每退朝久立子約憑几對之儀望俱華
儼然相映諸沙門竊窺之以為二天人也

崔劼

字彥玄清河人尚書令光之子也清虛寡欲好
學有家風累遷中書侍郎清儉勤慎甚為文宣
帝所知拜南青州刺史有政績尋除中書令加
開府待詔文林館監修撰新書初和士開擅朝
曲求物譽諸公頗因此為子弟干祿世門之胄
多處京官而劼二子拱撫並為外任弟廊之從
容謂劼曰拱幸得不凡何不在省府中清華之
所而並出外藩劼曰立身來恥以言自達今若
進兒與身何異卒無
覲求間者莫不歎服

崔肇師

清河東武城人少時疎放長遂變節更以謹
厚涉獵經史頗有文思初以通直散騎侍郎

使至齊州為土賊拘欲逼與同事聲師執志不動喻以禍福賊遂捨之聲師與從弟乾亨同居

崔模

事伯母甚勤後以參定禪代禮儀封襄城縣男仍兼中書侍郎

字叔軌身長八尺出後其叔雅有志度蕭寶寅討關隴引為西征別將屢有戰功封槐里縣伯

後行岐州事擊賊沒于陣永熙中贈驃騎大將軍都督相州刺史

崔孝芬

字恭梓挺長子蚤有才識博學好文章孝文召見甚嗟賞之後襲父爵累遷司空屬定州

大中正長于剖判甚有能名府主任城王澄雅重之遷廷尉少卿後加儀同三司兼吏部尚書孝芬博聞口辨善談論愛好後進終日忻然商確古今間以嘲諢聽者忘疲文章數十篇子勉

尚書右丞
顧涉史傳兼

崔孝直

字叔廉孝芬弟身長八尺眉目疎朗早有志尚稍還直閣將軍通直散騎常侍爾朱兆入

洛孝直以天下未寧去職歸里卒于家誠諸子曰吾才疎效薄于國無功若朝廷加贈諡宜循

吾意不得祇受若致干求則非吾意子士順位太府卿

崔孝政

字李讓孝直弟十歲父挺亡號哭不絕見者為之悲慘志尚貞立博學經史雅好詞賦喪

紀特所留情衣服制度手能執造位太尉汝南王悅參軍

崔敬邕

挺從祖弟為左中郎將以軍功賜爵臨淄男位營州刺史庫莫奚國有馬數百疋因風入

境敬邕悉令送還于是夷人感附卒于太中大夫贈濟州刺史諡曰恭

崔纂

字叔則挺從子博學有文才既不為時知乃著無談子論尋為廷尉正每有大獄多有據明有

當官之譽時太原王靜自廷尉監遷少卿纂恥居其下乃與靜書辭氣抑揚無上下禮入啓求

解位後為洛陽令卒贈司徒左長史

崔勵

字彥德光子器學才德最有父風舉秀才中兵彭城王參軍祕書郎中以父光為著作固辭不拜後除中書侍郎領軍將軍與從兄鴻俱有名于世

崔敬友

光弟精心佛道晝夜誦經居喪遂菜食終身恭寬馭下修身厲節自景朝已降頻歲不登

請丐者皆取足而去又置逆旅于肅然山南大路之北設食以供行者卒于家

崔長文

字景翰聰警有學識累遷平州刺史以老還家專讀佛經不關世事卒贈齊州刺史

崔庠

字文序長文弟有幹用為東郡太守元顥逼兗郡界庠拒不從命棄郡走還鄉閭孝莊還宮賜

爵平原伯拜潁川太守頗有政績卒贈驃騎將軍

崔道固

字季堅其母卑賤嫡母兄攸之等輕侮之父輯謂攸之曰此兒姿識或能興人門戶汝等

何以輕之時宋孝武為刺史以道固從事道固美形貌善舉止習武事孝武嘉之後為宋諸王

參軍

崔元祖

有學行善屬文仕至射聲校尉武帝取為延昌主帥從駕至何美人墓上為悼亡詩特詔

元祖使和稱為善

崔文仲

祖思宗人位徐州刺史封建陽縣子在政為百姓所懷除黃門侍郎

崔承宗

其父于宋世仕漢中母喪因殯彼後青徐歸魏遂為隔絕承宗性至孝萬里投險踰路負

喪還京師黃門侍郎孫惠蔚聞之曰吾于斯人見廉范之情矣于是弔贈盡禮之

崔遊

字子相上黨人少好學儒術甄明恬靜謙退自少及長口未嘗語及財利魏末察孝廉除相府

舍人出為氏池長甚為惠政以病免遂為廢疾泰始初武帝錄叙文帝故府僚屬就家拜郎中世及劉淵僭位命為御史大夫不就

崔光伯

清河東武城人北魏肅宗時為北海太守有司以其秩滿依例奏代明帝嘉其清譽詔更

任三年

崔延伯

博陵人仕北齊為元帥膽氣絕人兼有謀略積勞歷進西道都督延伯善將兵撫士得衆

心時與康生大眼為諸將之冠卒諡武烈

崔季舒

父子瑜鴻臚少卿兄孟舒廣平太守仲舒鄴縣令季舒涉獵經史仕北齊補大行臺中官

郎中官至侍中待詔文林館在官每推薦人士獎勸文學義聲翕然遠近稱美

崔叔瓚

仲哲次子有學識好直言北齊文宣擢為魏尹屬蝗為災帝以問叔瓚對曰按漢書五行

志土功不時蝗蟲作厲當令外築長城內興三臺故致此災耳弟季通終司農少卿季通子德

立好學善屬文終濟州別駕

崔季良

叔瓚弟風望閑雅仕北齊位太學博士以征討功賜爵蒲陰縣子卒諡曰簡

崔宏

字玄伯東武城人林六世孫少有俊才號冀州神童魏道武征慕容寶素聞其名徵為黃門侍

郎定國號為魏從幸鄴歷問故事應對如流道武善之遷天部大人進爵為公卒贈司空諡文

貞

崔浩

字伯淵宏子博極羣書明識天文歷官著作郎魏道武以其所上書嘗置左右及幸其私第多

問以異事累官至司徒嘗
參著作序成國書三十卷

崔逞

字叔夜瑛五世孫好學有文才仕慕容偉補著作郎撰燕記後歸魏拜御史中丞子順為散騎

常侍冀
州刺史

崔或

東武城人逞曾孫與兄相如俱自宋入魏相如有才學早卒或善醫術性仁恕官至冀州別駕

子景哲亦以醫術知名累官司徒長
史景哲子同仕北齊官至鴻臚卿

崔休

字惠盛逞玄孫仕魏為尚書左丞兼給事黃門侍郎參定禮儀累官司徒右長史公平清潔甚

得時譽歷幽青二州
刺史皆以清白著稱

崔亮

字敬德琰之後居貧傭書自業仕魏累官度支
尚書別立條格歲省億計遷吏部尚書奏為格

制以停解日月為斷後世相踵賢愚同滯
皆自亮始然其性公清所在並號稱職

崔陵

逞五世孫仕魏以建議功封武城縣公陵有文
學偉風貌端凝如神名輩燕集陵到一座無復

談話鄭伯猷嘆曰身長八尺面如刻畫聲如
洪鐘響胷中貯十卷書使人那得不畏服子瞻
才學風流為後來之
秀仕為相府司馬

崔光韶

亮從弟博學強辨尤好理論仕魏為廷尉卿
屢建讜議永安擾亂後還鄉里杜門却掃戒

子孫
儉

崔光

本名孝伯清河郿人家貧好學晝耕夜誦仕魏為中書博士撰國書郿文稱其才曰浩浩如黃

河東注今日之文宗也每有妖異詔問光光皆詳對婉諫累官司徒侍中進位太保卒諡文宣

子勵有父風為太尉長史中書令諡文貞

崔鴻

光從子博綜經史為魏尚書都兵郎中鴻弱冠有著述志撰為十六國春秋勒成百卷後遷平

州刺史卒

諡曰真

崔仲文

稷弟北齊天保初稷為侍中仲文為銀青光祿日受拜時云兩鳳連飛文宣嘗試觀射詩一

韻操筆立成拜散騎常侍光祿大夫子偃為太子洗馬尚書郎

崔彥穆

浩之後風韻閒雅器度方正奔江左仕關為黃門侍郎後復仕周官至戶部中大夫進爵

東郡公

崔惲祖

字悅宗東武城人父梁州刺史家財巨萬惲祖散與宗族凡假貸文疏悉焚之好學聚書

至萬卷仕宗為始安王記室

崔孝偉

魏莊帝時為趙郡太守郡經葛榮離亂後人皆賣鬻兒女夏根大熟孝偉勸戶人多收之

郡內乃安教其人種植招撫遺散先恩後威一周之後流戶大至興立學校親加勸勵百姓賴之

崔巨倫

字孝宗幼孤及長歷涉經史有文學武藝魏明帝時為殷州長史陷賊結死士夜中南走

逢賊俱恐不濟巨倫曰寧南死一寸豈北死一尺便欺賊曰吾受敕而行賊焚火觀敕火未然

巨倫手刃賊十
餘人賊乃四潰

崔贍

字彥通潔白善容止神采翛然言不妄發才學風流為後來之秀侍中李神見贍嘆曰昨見崔

稜兒便為後生第一
齊神武辟為祭酒

隋
崔儵

字岐叔仲文次子年十六郡守請為功曹不就後遂博覽羣書北齊舉秀才累遷三曹郎中與

李若齊名時人語曰京師灼灼崔儵李若齊亡歸鄉隋徵起累遷散騎侍郎易州刺史

崔猷

孝芬子性鯁直仕周拜御中正大夫隋初進爵汲郡公子仲方有文武才略仕周為司正大夫

崔子發

仲哲孫有文才仕為國子博士子端亦有才幹而文藝為優終北齊殿中侍御史子傳終

隋
泗州
刺史

崔廓

安平人隋時為里左屢逢屈辱乃入山中博覽書籍多所通涉山東學者多宗之不應辟命與

李士謙齊名

時稱崔李

崔游

字延叔少有風概為東郡太守郡有鹽戶數計丁悉籍為兵乃為表文聞請聽更戍郡內德之

又建學城南召生徒親自說經當時學者莫不勸勉號為良守

崔彭

士謙子剛毅有武工騎射略通周禮尚書文帝時累遷監門郎將在省闈二十餘年未嘗有惰

容

崔弘度

博陵安平人開皇初拜華州刺史遷襄州總管所在令行禁止盜賊屏息言行剛正見者

凜然長安為之語曰寧飲三斗醋莫見崔弘度

崔頤

字太冲安平人父廓博覽書籍嘗著論言頤七

歲能屬文開皇初射策高第與諸儒定禮樂授

協律郎居母憂水漿不入口者五日後奉詔與諸儒撰區宇圖志

崔躋

字祖濬為豫章王侍讀後去王重之不已遺書曰足下博聞強記視漢臣之三篋似陟蒙山對

梁相之五車若吞雲夢

唐

崔仁師

貞觀初為殿中侍御史上幸翠微宮獻清暑賦子浥浥子湜液澄淮並以文翰居要官每

自比東晉王謝

崔湜

字澄瀾定州人祖仁師貞觀中為侍御史湜舉進士累官中書令偕弟液澄從兄蒞竝以文學

居要官湜執政時年三十八嘗暮出端門緩轡諷詩張說見之歎曰文與位固可致其年不可

也及

崔衍

安平人父倫為吏部員外郎安祿山反不污偽官嘗使吐蕃留六年不屈衍擢明經調清源令

天寶末累遷宣歙池觀察使簡靜為百姓所懷幕府奏聘皆名士云

崔造

字云宰安平人永泰中與韓會盧東莢張正則三人友善好言當世事皆自謂王佐才故號四

夔貞元初德宗謂造敢言能立事擢中書門下平章事

崔損

博陵人大歷末中進士博學宏詞科累官至右諫議大夫貞元中拜相立心純白一無所私

崔祐甫

字貽孫博陵人世以禮法為聞家第進士累官至中書侍郎薦擢人材推至公以行卒謚

正文

崔玄暉

博陵安平人少以學行稱叔父秘書少監行功器之舉明經累遷鳳閣舍人轉天官侍郎

同鳳閣平章事為人清正寡欲弟昇為司刑少卿兄弟皆守正見重於時後以誅二張功拜中

書令貶卒於道謚曰文獻

崔瑗

博陵人顯子舉進士歷給事中遷工部侍郎宋中錫被護下秘獄叵測瑗請獄付外庭治之天

下稱賢以尚書左丞為荆南節度使徙東都留守終山南西道節度使贈尚書左僕射瑗性方

介有公台之望及卒時重惜之弟瑒瑒尤顯瑒位刑部尚書瑒河中節度使

崔珙

博陵人父顯生八子皆有才世以擬荀氏八龍兄瑒性行方介累官給事中珙為人精敏威重

擢嶺南節度使入對文宗訪撫治先後珙對精亮有理弟瑒河中節度使瑒子澹擢進士累官

同平章事

崔澹

與子舉止秀雅時謂玉而冠者擢進士第歷禮部員外郎中吏部侍郎

崔遠

澹子有文而風致峻整時人目爲釘座梨言坐所珍也乾寧中以兵部侍郎郎同中書門下

遷中書侍郎從遷洛罷爲尚書右僕射爲柳粲所陷崔氏咸寃之

崔峒

博陵人工詩文歷左拾遺終右補闕詞彩炳然時人稱其句披沙揀金往往見寶有集傳于世

崔圓

字有裕貝州人志嚮卓邁喜學兵法開元中歷京兆叅軍玄宗西幸次河池圓疏具陳蜀土腴

穀羨儲供易辦即日拜中書侍郎同平章事肅宗時爲淮南節度使在鎮六年請朝京師吏民

乞留之

崔日知

滑州靈昌人擢明經累官太常卿與弟日用皆以文學知名

崔良佐

滑州人擢明經補湖城簿以母喪去官遂不復仕治詩書易春秋有文名子鵬舉進士博

學宏詞賢良方正皆異等仕至武部郎中

崔元亮

慈州人擢進士第元和初為駕部員外郎清慎自持太和中改諫議大夫每遷官輒讓形

於色文宗時以直諫著名朝廷推為宿望移疾歸東都召為號州刺史

崔融

齊州全節人擢八行高科武后時遷內史鳳閣舍人時有司議關市行人盡征之以融諫止融

為文章華婉朝廷大筆多委之

崔善貞

浙西布衣德宗時上書闕下暴觀察使李錡恃恩驕橫驚動天下權酒漕運錡得專之凡

朝廷用事之臣錡以利交餘皆乾沒國用日耗德宗械善貞以錡錡預設大坎至則并械座中間者切齒憲宗即位錡反下詔削官爵錡既敗送京師腰斬於城西南贈善貞睦州司馬

崔敏

清河人憲宗時補歸州刺史州巖湍悍人多類鳥獸敏治多馴擾改永州刺史俗尚鬼戶為胥

徒家有禮梗悖於政經莫能禁禦敏約束部吏黜其侵牟毀其淫祠戮其妖師于是征貢用集民狎于野

崔從

字子久融曾孫擢進士第累官尚書左丞長慶初領鄜坊節度羌不敢犯境卒諡曰正從立朝

有風望內無聲伎
娛玩士大夫賢之

崔善為

貝州武城人精歷數始勸高祖舉義及兵起署大將軍府司戶叅軍以清察見稱後歷大

理司農卿出為秦州刺史卒諡曰忠

崔義玄

選之後貞觀初歷左司郎中兼韓王府長史以介直稱後遷婺州刺史討平睦州寇拜御

史大夫終蒲州刺史子神基仕至大理卿

崔神慶

義玄次子舉明經累遷禮部侍郎數陳時政轉太子右庶子更日侍講東宮歷司刑卿子

琳累遷太子少保珪太子詹事瑤光祿卿俱列榮戟世號三戟崔家

崔日用

荊州長史入奏計因言太平公主逆節有萌帝曰畏驚太上皇奈何日用曰庶人之孝承

顏順色天子之孝惟安國家定社稷帝納之累官戶部尚書

崔惇

宣州刺史為治務大體不苛細號為良吏

崔嘏

李德裕之謫嘏適草制以德裕忠貞不盡書其過坐貶瑞州刺史

崔元略

博州人父敬貞元時尚書左丞元略第進士累官義成節度使弟元式中書門下平章事

卒贈司空

崔隱甫

武城人為殿中侍御史時浮屠慧範倚太平公主脅人子女隱甫劾之反為所搆貶邛州

司馬玄宗立擢汾州刺史以廉潔自守累遷御史大夫多所劾正威名赫然後遷刑部尚書封

清河郡公

崔羣

貝州武城人未冠舉進士累官翰林學士中書舍人數進諫言憲宗嘉納後以皇甫鑄譖出為

湖廣觀察使穆宗立召為吏部侍郎俄拜御史大夫官至吏部尚書

崔邠

字處仁武城人父垂三世一襲邠以進士為補闕論裴延齡奸以鯁亮知名累官吏部尚書弟

邠邠鄆鄆鄆累官禮部尚書家不藏貲有輒周給親舊邠同平章事俱進士及第宣宗以其一門孝友為題其齋居曰德星堂

崔漢衡

博平人沉懿博厚善與人交建中初吐蕃請盟以殿中少監為和蕃使定盟清水官至晉

慈隰觀
察使

崔咸

字重易博平人素有高志造詣深遠尤善詩歌元和初擢進士又中宏辭遷侍御史處正特立

風采動人一時
官至秘書監

崔鉉

字台碩元略子舉進士累官中書舍人學士承旨武宗好蹴鞠角觝鉉切諫帝褒納之後為淮

南節度使討叛有功累封魏公子
沆累遷戶部侍郎改中書侍郎

崔彥昭

羣從子由河陽節度使徙河東撫循有法境內大治遷中書門下平章事每退朝侍母膳

與家人齒順色柔聲人多其孝子殷誥潞州刺史

崔知溫

鄆陵人仕為靈州司馬有善政累遷中書令兄悌戶部尚書子泰之工部尚書諤之以

功封博陵侯

崔寧

衛州人世業儒實應初為利州刺史朱泚亂德宗出幸奉天寧謂所親曰上從善如轉規但為

虛杞惑耳杞聞而譖殺之中外為之稱冤

崔敦禮

咸陽人多涉書傳以節義自持武德中為通事舍人善辭令進止太宗時官至中書令

崔覲

城固人業儒躬耕自給老而無子乃以田財分給奴婢自與妻隱南山節度使鄭餘慶辟為叅

謀號稱長者文宗時召為起居郎辭疾不至

崔碣

字東標尹河南辨王可久獄時淫潦獄決而霽都民相與歌舞於道

崔光遠

玄宗時為京兆少尹及帝西狩詔留光遠為京兆尹西京留守採訪使乘輿已出都人亂

火左藏大盈庫爭輦財珍至乘驢入宮殿者光遠乃募官攝府縣斬十數人乃定

崔俊

字德長性介潔矜已之清視賊負者若讎以蘇州刺史奏課第一遷河南觀察使

崔戎

字可大憲宗時為華州刺史吏以故事置錢萬緡為刺史私用戎不取及去召吏曰籍所置錢

享軍無重矯激以誇後人也徙充海沂密觀察使

崔遠

監察御史巡錄京城繫囚伸雪冤枉遇下嚴察為人所誣流崖州

崔信明

以五月五日生日方中有異雀鳴集庭樹史占之曰生子當以文顯位殆不高貞觀中為

秦川令卒工詩有楓落吳江冷之句

崔琳

開元中為中書令舍人弟珪瑤每宴集組印相輝華數盈門一榻置笏重疊其上元宗命相先

書其名覆以金甌會太子入帝謂曰此宰相名若目意之誰乎太子曰非崔琳盧從愿乎帝曰然兩人有宰相名望

崔渙

博綜經術長議論吏部侍郎嚴挺之施特榻誠彝遵名謂曰子清廟器故以題相名

崔沔

字善冲京兆人儉約自持祿廩隨散宗族不治居宅嘗作陋室銘以見志

崔縱

渙子初以蔭補協律郎遷監察御史詔擇令長于臺省除藍田令寬明勤幹德化大行累遷金

部員外郎六遷大理卿兼御史中丞德宗幸奉天四方握兵未有至者縱先知之潛拜李懷光勸令奔命懷光從之縱乃悉歛軍財與懷光俱來調給具備加右庶子充使數奏懷光剛愎反覆宜陰備之及行幸梁州左右短之曰縱素善懷光今不來矣上曰他人不知縱吾可保其心不數日縱至拜御史大夫縱孝悌修飭自立以父為元載排抑退居十餘年左官外府訖載得罪不求聞達初渙有寵妾鄭氏縱以母事之鄭氏性剛戾待縱不以理雖為大僚每加笞詬縱率妻子候顏色敬順不懈時以為難

崔行功

井陘人鉅鹿太守伯讓曾孫行功少好學中書侍郎唐儉愛其才以女妻之儉前後征討

所有文表皆行功之文高宗時累轉吏部郎中以善數奏嘗兼通事舍人坐事貶為游安令尋徵為司文郎中當時朝廷大手筆半出行功之詞

崔元翰

博陵人進士擢第登博學宏詞制科又應賢良方正直言極諫科三舉皆昇甲第年已五

十餘李汧公鎮滑臺辟為從事後北平王馬燧在太原聞其名致禮命之入朝為太常博士改知制誥詔令溫雅合于典謨然性太剛褊不能取容于時忤執政罷知制誥守比部郎中元翰苦心文章時年七十餘好學不倦既介獨耿直唯秉一操伏膺翰墨其對策及奏記碑志師法班固蔡伯喈而致思精密為時所欽

崔鄩

少有文學舉進士元和中歷監察御史太和元年十月自太子詹事拜左金吾衛大將軍鄩昆

第六人仕官皆至三品鄧鄧鄧三人知貢舉掌銓衡冠族聞望為時名德鄧太和九年冬為左金吾大將軍無病暴亡贈禮部尚書子瑄

崔鄲

登進士第累遷監察御史三遷考功郎中太和三年以本官充翰林學士轉中書舍人六年罷學士八年為工部侍郎集賢殿學士權知禮部判吏部中銓事

崔璿

博陵人以書判拔萃開成中累遷至刑部郎中會昌中歷三郡刺史位終方鎮璿開成初為吏部郎中轉給事中會昌初出為陝虢觀察使遷河南尹入為御史中丞轉吏部侍郎大中初改兵部侍郎充諸道鹽鐵轉運使子滔大初中登進士第

崔璵

字朗士博陵人長慶初進士擢第又制策登科開成末累遷至禮部員外郎會昌初以考功郎

中知制誥拜中書舍人大中五年遷禮部侍郎六年選士時謂得才七年權知戶部侍郎進封

博陵子食邑五百戶
轉兵部侍郎子澹

崔球

字叔休博陵人寶曆二年登進士第會昌中為鳳翔節度判官入朝為尚書郎子漬

崔沆

博陵人元略之子登進士第官至員外郎知制誥拜中書舍人坐事貶循州司戶乾符初復拜

舍人尋拜禮部侍郎典貢舉選名士十數人多至卿相乾符末本官同平章事遇京國盜據從駕不及而卒沂後官亦隆顯

崔璿

博陵人代宗時為澶州刺史不為煩苛人便安之戶流亡還歸居二年增戶萬數詔特進五階

以寵異政仕終
湖南觀察使

崔彥曾

咸通初，繇太僕卿為徐州觀察使。曉律令，龐勛反，或勸彥曾奔兗州。彥曾曰：「我方帥也，奉

命守此，惟有死爾。」斬議者一人，號于眾，俄而勛傳城。彥曾悉誅賊家屬，勛超墻入，囚彥曾。入彭城館，有曹君長者，說勛曰：「貴賤不並處，今朝廷未以留後命公，蓋觀察使存耳。」勛乃殺彥曾于寢，自監軍使達官屬皆死，贈刑部尚書。

崔植

祐甫子，與鄭單同為補闕。朝廷得失，更疏論執。譽望蔚然，累官至宰相。穆宗問貞觀開元之治，奏對明切，因言願以無逸為元龜，帝然之。

崔龜從

三中賢良方正，言敬宗廟室不當稱孝弟，免官。

崔協

博陵人，大中元年，以戶曹攝上虞令，值歲旱，田賦無所出，協傾家貲代輸之，及卒，邑人立廟祀。

之

崔慎由

字敬止從之子端厚有父風為相與蕭鄴有隙上餌丹渴躁欲赦無名慎由請立太子上

怒鄴乘是諧口去之而引劉瑑初仇士良使作廢文宗詔以死不敢承故子清終除宦官

崔郾

字廣略治號以寬月不咎一人及涖鄂則嚴法一不貸或問其故曰陝土瘠而民勞吾撫之易

服鄂土沃民剝雜以夷俗非威莫能政貴知變也

崔液

字潤甫工五言詩題呼曰海子我家龜龍也

崔弘禮

天平軍節度使屢以破賊功加檢校尚書左僕射

五代崔居儉

清河人祖彝父曉皆為唐名臣居儉善文詞舉進士仕梁為翰林學士歷唐晉官至戶部

尚書其家專以門望自高嘗自著家禮行之

崔稅

安平人父琢唐末為刑部郎中稅少好學博涉經史工文辭舉進士唐明宗時累官翰林學士

晉初改工部侍郎學士承旨草制宰相桑維翰欲改易不能得官至尚書左丞太常卿改太子賓客而卒

宋

崔希甫

高郵人有文武才略潘美薦于朝召見賜金紫知原州拜監察御史更置諸道事務又面

賜金帶仍命賜魚時號重金御史

崔公度

高郵人口吃不能劇談書一閱即不忘遂覽羣書英宗時擢國子直講不就熙寧中作一

法不利論以進召對擢光祿寺丞知陽武縣後復召對命以館職終直龍圖閣

崔涇

靜海人為兒時見蟻出穴不敢踐及長見蠅蝶投網必與救脫見網罟者多與之錢令其改業

又率鄉人共為放生會其後子為郡文學二孫端禮端詩皆登進士

崔頤正

封丘人與弟偓偁並舉進士頤正初為高密尉以孔維薦為國子直講刊正諸經音疏真

宗時日召頤正於文苑中說尚書仕終國子博士偓偁自連江尉入為直講真宗幸國學說尚書所著有帝王手鑑十卷

崔立

鄆陵人中進士歷知數州有循良之政後以工部侍郎致仕性淳謹喜論事事真宗仁宗前後上四十餘奏多見施用

崔鷗

陽翟人舉進士積官殿中侍御史徙右正言累章極論章惇蔡京罪惡時議歸重有古學為文

至多尤長於詩清峭雄深
有法度有遺文三十卷

崔敦禮

通州靜海人與弟敦詩同登紹興中進士愛
漂陽山水買田築居敦禮仕至諸王宮大小

學教授敦詩仕至中書
舍人加侍講直學士院

崔翰

萬年人風姿偉秀驍勇有謀太祖時以功累官
瑞州團練使後從太宗征太原流矢中其頰督
戰益急擢武叅軍節度鎮安化軍以疾召還上
言臣既以身許國不願死于家仍令赴鎮月餘

卒贈
侍中

崔頌

偃師人父協後唐平章事頌以蔭補官歷漢周
官至左諫議大夫宋初判國子監太祖問以一
時典禮頌占對閒雅上甚重之子曉太子右
贊善大夫曠雍熙初進士官至太常少卿

崔敦詩

字大雅常熟人紹興進士主楊州高郵簿除秘書省正字歷樞院編修官學士院權直遷

著作郎進國子監司業拜中書舍人敦詩性謹厚知大體直宿通講所陳必剴切至造膝密啓家人不得覘其藁上深器許之有文集三十卷制藁二十三卷奏議五卷通鑑要覽六十卷制

海十冊監韻五冊

崔貢

字廷碩仁和人端重有學識履行飭備黨里咸敬事之大觀中詔天下郡縣保任士有孝弟睦

端任恤中和八行者貢入太學司成考驗以聞釋褐命官政和五年郡太守董正封舉貢應詔

授密州文學卒鄉人尊之曰八行先生洪武初仁和縣學建三賢祠貢與褚文公許荊州竝祀焉

崔嶧長安人進士及第累官河東轉運使會更錢法潞州大擾推其首惡誅之人心遂定後歷知同

州鳳翔河中以刑部侍郎致仕

崔通

元豐間為於潛令有遺愛嘗與元豐塘為邑人利至今呼為崔長官塘

崔仁冀

錢塘人吳越錢俶為通儒學士太祖嘗諭俶使入朝仁冀告俶曰主上英武所向無敵

保族全名上策也俶然之太宗時俶與仁冀決策納士且薦其才能於是擢衛尉卿

崔彥進

大名入純質有膽略善騎射初仕周至都虞候宗初累立戰功積官至彰信節度使鎮河

陽卒贈侍中

崔縱

字元矩臨川人政和中進士累官至承議郎二帝北狩高宗欲遣使通問廷臣咸畏避不行縱

毅然請往乃授試工部尚書比至責以大義金人怒徙之窮荒縱不少屈竟握節而死詔錄其

兄子延年為後

崔遵度

字堅白江陵人後徙淄州舉進士咸平初為太空中允改太常丞為編修官改左司諫仁

宗時遷吏部郎中兼左諭德卒遵度與物無競淳澹清素於勢利泊如也善於鼓琴嘗自著琴

箋有文集

二十卷

崔子房

字彥直涪陵人徙居縣南通春秋學與東坡山谷諸名士遊嘗知滁州曾子開作記刻石

醉翁亭側又嘗與歐陽

文忠公辯芳草澗詩

崔與之

字正子增城人父世明博學精於醫貧者療之不受其直與之紹興中舉進士累官四川

安撫制置使威惠兼濟兵民悅服召為禮部尚書又除叅知政事進右丞相皆辭不就卒追封

南海郡公

諡清獻

元

崔斌

馬邑人魁岸雄偉善騎射尤攻文學而達政術世祖時累官江淮行省左丞危言讜論無有所

諱嘗行省湖南潭人為立生祠及卒追封鄭國公諡忠肅

崔或

弘州人剛直敢言世祖器重之累官御史中丞刑部尚書上疏言時政多見施行成宗時官至

平章政事卒追封鄭國公諡忠肅

崔履謙

至元十四年同知溫州府事時劉萬奴棄城遁喉元帥呼圖克屠城履謙與治中家之柄徐

似孫力爭獲免遊軍略民間子女履謙奮不顧身力脫之

崔天德

字君誼吳江人元末為金玉局副使嘗與周伯溫高楊張徐為友以友竹自號自為叙在

吳江志

崔彥輝

錢塘人號雲林生與王蒙皆吳興趙氏甥善篆隸詞賦畫亦超詣隱居賣藥鹽橋臨沒無

子有甥鄭為後學室至今猶以崔氏署扁

明崔聚

懷遠人永樂起兵以功累陞薊州衛指揮使扈從北伐敗敵兵陞河南都指揮僉事又陞左軍

都督僉事征交趾力戰而死

崔齡

字人年吳江人天德子洪武初以人才授刑部主事以直諫坐藍黨死

崔亮

洪武初濟南知府撫綏得宜士民感服後陞禮部尚書

崔惠

晉江人宣德中領鄉薦任江西石城教諭叛賊陳椿入陷石城惠為賊所執逼令從之惠罵曰

吾豈從汝狗奴反耶會燬草營即投火焚死

崔恭

字克讓直隸廣宗人正統進士仕至吏部尚書諡莊敏公寬平坦易中無芥蒂其在吏部慎恤

人才庶靖自居人知嚴憚

崔植

字斯立鄭人治春秋得聖人心法辨論公穀左氏三傳得失歷歷如指掌究極羣史平居儀度

整肅不假修飾而規範自然洪武七年薦為郡學教授後調處州以成就後進為務受業者日衆必傾竭底裏隨其才而篤之卒于官植文學德行卓絕流輩一時碩儒莫不想聞其風采自號丹山樵者有雜著文集若干卷

崔源

字有本世家雲中天性孝友深沉有智襲寧波衛指揮同知蒞政老成人不敢干以私正統十

三年閩浙盜起從總兵寧陽侯剿捕累獲奇功檄禦金華殺賊一十七級生擒陳唐奇等五十

人解京功升署浙江都指揮僉事改檄武義一日火發聯營源倉卒遇敵時仲弟澄季弟清從在營中源曰事急矣我當死之弟可自為計即應聲曰兄既死忠我乃不能死義乎遂挺身而前皆力戰而死朝廷憫之遣官賜祭復俾其子胤世襲焉

崔靈

字廷用直隸通州人登弘治丙辰進士歷官所至有聲後守武定州因時變乞歸丘園羨臨清

為天下通津遂家焉美丰姿多技藝善騎射人多以文武才目之時士夫皆與之交游

崔東

字震初洪武初知永新縣事有治聲賦均訟簡民去後思之

崔以嗣

敦詩之裔洪武初以儒士薦授葭州同知敷政平易操持廉慎歷知縣

崔巖

字民瞻郴州人成化辛丑進士歷戶部郎中陞山東江西河南布政使轉左都御史擢南京工

部左侍郎卒巖平生嚴肅不苟合居官三十餘年田園如故云

崔銑

字子鍾河南安陽人弘治進士仕至禮部右侍郎贈尚書諡文敏公宏才博學好古能文素履

醇然出處無玷淵醇清邵卓然巨儒

崔桐

字來鳳泰州人正德中解元進士及第授翰林院編修陞侍讀湖廣提學副使福建叅政南京

太僕寺少卿改太常寺少卿提督四夷館陞太常寺卿掌國子監祭酒卒南京禮部右侍郎

崔永

字彥齡海鹽人七歲喪父其母韓更里人桑慎從戍海南永思母不置遂徒步走海南行次瓊

州得見母會慎歿永求歸母所司不可永哀請
于國朝許之歸舟遭風母失水永入水負母得
活而永竟以寒疾死江西布政使茹大
素葬祭之海南人至今稱崔孝子云

崔克昇

內黃人幼以孝聞父邁疾醫弗能療克昇取
父大小便嘗之以審輕重卒治得瘳父年九

十九卒克昇跣足負土築墳廬墓
三年有司上其事詔旌表其門

崔允

字懋原代州人元弟嘉靖
癸未進士歷刑部郎中

崔學履

昌平州人嘉靖庚戌
進士歷光祿寺少卿

崔棟

薊州人嘉靖庚戌
進士任監察御史

崔大德

字子謙長治人嘉靖癸丑進士歷麻平知府
性爽愷以誠待人中有執持不屑苟隨以事

忤監司掛冠
去郡人思之

崔文奎

字應宿成化甲辰進士
歷戶部尚書謚康簡

崔幾

字汝瞻保定府蠡縣人嘉
靖辛丑進士歷山西僉事

崔近思

濱州人嘉靖庚戌
進士歷山西叅政

崔元

代州人正德中駙馬都尉嘉靖初以
迎立功封京山侯弟允癸未進士

崔文

安慶衛指揮宸濠之變攻圍安慶二十餘日
自後開門從殺寶文之功事平進署都督

崔澂

字淵甫吳江人天性孝友博學多文能詩工書
真草篆隸為人所寶有傳響集行世姪闕亦善

書能
詩

崔深

字靜伯吳江人正德中以字學薦授中書舍人博覽好古畫梅入品

崔都

蒲州人嘉靖庚戌進士歷布政司叅議

萊

萊子國以國為氏

周

萊駒

晉大夫

漢

萊章

明

萊從善

四川人宣德中新喻縣教諭

臺

臺貽之後

漢

臺崇

侍中為曹操所殺

臺佟

字孝威鄴人隱於武安山鑿穴為居採藥自業州辟不就刺史行部乃使從事致謁佟往謝刺

史乃執贄見佟曰孝威居身如是甚苦佟曰佟幸得保終性命存神養和如明使君奉宣詔書

多惕庶事反不苦耶遂去隱於深山終莫能見焉

晉臺彥

字國雋漢侍中崇之後專京氏易善圖讖秘緯天文洛書風角星算尤善望氣占候推步之術

隱居商洛南山

唐臺蒙

合肥人善唐末揚行密表為檢校太保宣州觀察使

宋臺亨

元豐間人與司馬溫公著問問之書者五人亨其一也

明臺謙

永樂中諸城縣貢士任訓導

臺獻

泰安人成化中直隸清河縣訓導

萬歷癸酉舉人
臺存道諸城人

萬歷間直隸永平府灤州吏目臺鳳磁州人

開望出陝西姬姓衛公子開方之後

周開府 齊大夫

漢開章 司馬

宋開趙 武功大夫英州刺史嘗取肝救父詔曰開趙昔忠於國今孝於親特轉團練副使

明開濟 字來濟河南洛陽人國初舉明經授訓導仕至刑部尚書坐黨禍暴卒

台 本墨台氏避事改焉

南台寬 遼西郡守玄孫峰樂陵公峰
北台寬 子昂長沙公昂弟光安平侯

明台鼎 當塗人洪武中
任長陽知縣

邵平 盧商音炎帝之後姜姓所封以邑為氏

宋邵端 儒林郎食
判連州

明邵鼎 當塗人正統貢
士長陽縣知縣

邵溥 繁昌人正統
貢士任縣丞

邵清 江寧人景泰
舉人任御史

邵傑

江寧人景泰舉人任教諭

邵博

當塗人正德中太常丞

邵泗

溧水人正德舉人任教諭

邵周先

字國定高郵人正德舉人任知州

哈

明哈左

弘治中光州舉人任平鄉教諭

才

明才俊

昌黎人宣德中任高郵州判官

才寬

字汝栗直隸遷安人天順進士罷度宏濶遇事裁決無滯歷官宣大總督兵部尚書遇敵中流

亡矢

材

宋

材致

州知韶

哀

東陽羽音魯哀公後因諡為姓又望出南康

周哀駘它

衛人貌惡魯哀公召而觀之果以惡駘天下授以國政仲尼曰是必才全而德不形者也

漢

哀章

王莽將

哀宏

尉都

哀仲 種梨

哀學賢 建安人
下邳令

哀置 樂成
王相

宋
哀道訓 崇安人
紹興進士

哀蘊元 崇安人
紹興進士

哀彬 字丕承 崇安人
紹興進士

哀謙 字彥先 崇安人
靖康中耕隱黃洋原
結廬名王泉
有時人不識
田園樂只羨相如
駟馬車之句

哀夢松 建安人
開禧進士

哀長吉

字叔巽崇安人嘉定進士調靜江軍掌書記秩滿致仕號委順翁徜徉林泉托興吟咏雖

老手不釋卷

明

哀英

邵武人成化間太平府訓導

哀育

崇安人宣德貢士

哀賢

萬安人弘治舉人任寶慶府推官

哀道寧

中部人弘治中弋陽縣丞

哀明

南召人弘治中廬州府學訓導

哀冲霄

湘潭人正德中鞏昌府通判

哀正

蒙城人正德中任信豐縣丞

哀世用

嘉靖乙卯江西舉人後改哀姓

杯

見姓苑

宋杯承寵

元豐間知洪州

回祝融子吳回之後

明

回謙

巢人宣德中任監察御史陞慶遠知府

回裔

營昌人宣德中蒲州知州

梧

音裴

漢

梧塑

賢士爰盎
從問占文

頽

頽當

七國反時將軍曾遺膠東膠西書曰奉詔誅
不義降者赦不降者滅之王何處須以從事

雷

宋

雷恢

元祐初
府教授

哉

見姓苑

栽

見姓苑

該

見姓苑

財

見姓苑

數

八數潰之後以王父字為氏

涑

州名見姓苑

魁

見姓苑

本朝景泰二年浙江黃巖縣主簿魁倫
登州萊蕪縣人貢士

魁

桓魁之後

媒

音梅見直音

壇

音臺古文臺字見直音



萬姓統譜卷十七